

友

聲

集

知魚樂齋存稿

清河張 恂步凡著 鴛湖王 相惜庵輯

無題

碧桃時節記分攜
驪唱無端意欲迷
門外斜陽人遠近
眼前流水路東西
漫將飄泊憐風絮
枉遣殷勤認雪泥
一夢揚州偏易覺
春聲腸斷杜鵑啼

相思何計報瓊瑤
醒既難逢夢亦遙
月底顏唐名士酒
花前招帳美人簫
五更星影隨雲散
百琲珠光逐露消
辛苦長安尋玉杵
裴郎歸路失藍橋

綠楊陰裏是雕欄
長觸情懷賦惱公
解珮但遺江渚北

窺臣誰見宋家東可能桑姓無人忌未必桃源有路通
十二闌干閒倚遍朝朝極目送飛鴻

一分相憶百分癡十樣蠻牋七字詩海燕頽頽尋壘日
山花零落退紅時無根乍合啞萍跡作寸還連臘藕絲
擬把因緣問龜策埶黃梁卵未曾持

閨情

翠帷深下煖香融學步邯鄲未易工鏡裏芙蓉羞對月
水邊楊柳怯當風霓裳製就琵琶換雲錦裁成杼柚空
怪煞年來新燕子尋巢飛過粉廊東

卽事書懷

未肯愁來筆硯焚男兒膽有氣凌雲春寒入骨詩猶健
暮雪關心酒易醺漫把一囊悲趙壹敢將三窟笑田文
憑君莫望揚州月月到揚州只二分

紀災新樂府

并序

道光辛卯壬辰之間淮揚馬棚灣決口米穀踊貴
民苦食艱自冬徂春藜藿亦倍直且奇寒於是淮
揚之民死於水者半死於工者半非水非工而凍
餓死者更踵相接也况隄政久敝淮北仰食於隄
者不下數千人復有開行改道之說小民無識寤
寐心驚良者坐以待斃猾者迫而爲奸耳目所經

不勝彫瘵爰仿香山之體述爲樂府十四章

妾誤郎

西風颯颯淮波揚禍將不測人皇皇有錢無料難修防
吝錢不與妾誤郎長隄一決不可當生靈半飽魚鼈腸
妾貌越溪花妾心使君虎災黎含恨爭識汝唾面褫裳
虎成鼠妾雖誤郎終不誤淮平且喜郎如故

骨如山

骨如山馬棚灣腥風起白日寒決隄已塞旋復裂合龍
倉猝誰能完工可代賑亦妄耳淮揚民命如草菅君不
見馬棚灣骨如山

人啖土

凶年饑歲苦復苦十家九家塵沒金尙冀春來有轉機
米價傳聞涕如雨何不啖糠覈無錢腹難鼓何不啖樹
皮無力鋤難舉床頭有土閉目吞腸胃不受吐還茹吁
嗟乎人未歸土先啖土啖土之人不勝數

屋作薪

貧無薪惟拆屋屋拆難爲無米炊擔向街頭易菽粟可
憐柴一束易粟不盈掬兒女紛爭難果腹破薦蒙頭相
抱宿屋角纔埋新死人三更人鬼同聲哭

牽兒賣

失傳
三
牽兒賣割母愛賣兒不爲償宿債只爲饑腸轆轤鳴母
死但願兒常在兒噉不去持母帶賣兒高門兒勿哭高
門之內皆食肉

秤稱人

秤稱人人論斤論斤非欲食其肉轉鬻江南作奴僕羸
童瘠女殊可憐一斤不能易百錢雖不值錢人亦喜謂
可少緩須臾死誰料江南亦苦荒哀鴻遍野嗟無梁

粥化水

開廠賑粥饑民喜紛紛領粥粥化水饑民勿怨不見米
竊米云是羣餓鬼餓鬼至自高郵境旣死來奪生民命

嗚呼鬼無腸胃亦無腹凶年奇事鬼食粥

罵坐客

義紳給賑賑未畢海錯醇醪紳會食適從何來罵坐客
白挺如飛恣一擊滿案杯盤倏瓦礫强者支吾弱者泣
問君暴怒果何因門外饑民如鵠立

盜攫錢

盜攫錢二十緡攫錢不在荒僻徑乃在風憲高垣邊隆
隆高垣卡兵守如何盜賊公然走盜攫人錢先掄口老
兵酣睡緣被酒攫錢既去人不驚此時譙鼓才二更

犬食人

犬食人東西奔死者飽其腹生者過之氣欲吞狸毛赤
目聲狺狺噫吁嘻人供犬食不可救犬毋食人人肉瘦

開鹽行

開鹽行開鹽行牟利之策無其良窮竈錙銖一網盡更
將出納苛場商不知

國課如何償我聞牛皮古寨錢家集鹽行之名巨梟立
梟不畏官無奈何官欲爲梟勢岌岌

鹽改道

鹽改道官曰好途徑捷經費少可憐淮北窮編氓一聞
此語齊吞聲大府孤忠籌

國計小民焉敢求其生黠者亦恐民積忿弭謗請留七
萬引

抽埽柴

抽埽柴欲何爲甘蹈法實苦饑有客經過呵令止此是
官埽那得爾官若見之汝應死聞言吃吃笑不已客胡
不達遽如此來往官與似流水抽柴不自今日始

失巢鷗

失巢鷗意怫然不匿影不戾天鼓翼長淮巨波起搖隊
還將吞海水喚得鷗梟結隊來啄殘燕雀心方喜傷心
哉爾之失巢非雀故爾縱復巢雀敢怒搏擊頻遭雀何

苦

有偽傳余改字者戲東禹山梅江

并序

拙字本日布帆三十後易以步凡今四十有二
矣十載以來詩壇文囿酒隊歌場纓屐名流輿
臺村豎聞聲相喻脫口而呼未有異也昨禹山
述梅江言余近改字補帆不審所傳奚自惟念
蓬蒿匿影湮沒久甘僑髀高賢猶復縱言相及
事固無證情則難忘戲述短章用塵英聽坊州
之采杜若耶驚坐之誤孟公耶旣以相質行自
嘲焉

鍊石奇功事渺茫少留罅漏亦無妨舌耕不足春誰省
口過思除語尙狂一合脂傾餘骨健補骨脂藥名十年牢破
悔羊亡漫云小補何曾補塵海隕帆已怯張

趙忠毅鐵如意歌

男有厥公女奉聖千秋遺臭資談柄何似儒林片鐵留
至今人拜英風勁趙公卓犖人中賢精剛不屈思回天
指揮直擬妖氛掃掎擊能令閹膽寒閹膽寒閹怒起慘
慘孤臣貶萬里霜風蕭條琅璫鳴此時如意充行李摩
挲如意難高歌欲平禍亂無金戈貂璫薰灼天地閉如
意其如失意何凜凜忠魂憑一握唾壺擊碎吞聲哭古

今同調誰堪屬淚灑西臺皋羽竹

知魚樂齋存稿終

邁伯先生本名恂字步凡後更名豐玉別號邁伯少岐
嶷爲同里汪文端公所器妻以次女珠光照乘劍氣衝
霄發爲文章烺烺炳炳其視掇巍科膺華選直旦暮間
事耳顧以傲岸磊落不屑屑依人作計浮沈諸生中其
遇可謂窮矣辛卯秋薜蘿臺香精舍此君小異歡若平
生酒酣論文風發泉湧繼此每會必偕亦座無車公不
樂也義馭不留尺波電謝沒前數月爲余題四十小像
中有句云故人別盡歡場歇彈指浮雲二十年慨乎其
言之已夫人當少壯銳以功名自奮迄不得志以病以
老以死而觥觥嶽嶽猶浩然自得如先生者嗚呼難矣

甘岩王娶之謹識

存稿
容湖

序

詩立於天地間久矣而自皇初以來詩之存者幾許哉
年代彌近存者彌多吾彌知其不足恃詩必與天地相
敝迺可謂之存吾耳目所逮非存也年來與蓉湖舅氏
鄰日夕論詩夙旨相契一日命勘詩冊取而細讀之擇
其尤者書曰可存可非靳詞蓋以不朽之盛事待之矣
舅氏風味古澹溯源漢魏下沿阮陶一生精力畢萃於
此得失自知奚假後生喋喋爲顧自製文藝都難割愛
拙眼在側亦勝局中無它有私與無私之分也鄙人雖
無識然擇別茲編極不敢苟且苦心索之將欲與萬世

以下人心目相訂正耳噫此事甚大寧精毋多乃能永
久卽吾所云可存者吾舅視之必猶慮其多也漢魏無
論矣阮陶之詩多乎哉

道光二年壬午閏三月望後愚甥潘德興書於澗東之
養一齋

容湖存稿卷之上

山陽盧 慆月江著 鴛湖王 相惜庵輯

曉發呂城

驛樹噪饑鴉江風動曙霞曉星纔墮地殘夢未離家客
況同賓雁雄圖慨陣蛇吳城何處是一徑野蓮花

澄江舟行

煙濤浩無涯推篷豁遙矚白鷺下長天點破秋江綠

秋日登君山望江

高秋曠望海雲消絕頂山堂鎮寂寥一盞酒澆黃歇墓
半天雪擁伍胥潮隔江埕影懸清漢拍座濤聲撼麗譙

明日片帆便東下吳頭楚尾路迢迢

夜歸

殘月下遙天西風響蒲荻前浦漁舟歸微茫數聲笛
但見湖上煙不見煙中嶼何處古浮圖一鈴獨自語
淩波如行空湖光夜深上薄寒微中人無言坐秋舫

和靖先生墓

先生不可作白鶴亦高飛片石留千古平湖繞四圍
花寒曲港人意淡斜暉想像清風在維舟未忍歸

斷橋晚眺

孤嶼梅千樹東來是斷橋薄雲寒欲雪曲渚晚將潮有

境共吟嘯無人話寂寥一杯蘇小墓烏柏冷蕭蕭

讀史雜咏

茂陵篇

漢書

天子好開邊將軍出居延天子好神仙將軍朝甘泉
樂大侯寶鼎出龍文薦詞太一貳師西征宛馬來蒲稍作
歌天顏開旌旗千里震沙漠建章萬戶迷闔閤東甌南
越歸販圖朝朝盼斷蓬瀛壺甯思十萬天山士亦願長
生不願死

何第一

詩書燔盡刀筆出漢廷功臣何第一泰交詎殊三代風

惜哉以術相彌縫上使使勞丞相苦悉遣子孫詣軍所
置衛衛君非寵君讓封勿受仍佐軍買地自污上心慰
上林一請下廷尉當時若非衛尉言那得生出犴狴門
嗚呼功人尙如此彼功狗也固當死

睢陽曲

平臺築罷睢陽築城頭齊唱睢陽曲七十餘城擁大都
旌旗輿馬紛馳逐梁王來同車同輦天顏開梁王去賞
賜金錢不知數萬歲傳王甯有此誤聽絲綸心獨喜當
時詭勝幸伏誅不爲吳楚亦僅耳且喜宮中有一韓入
關之計從茅蘭官家太后相持泣尺布淮南忍再看北

山牛出梁王歿英豪雲散風華歇可憐只有老枝生白
頭腸斷梁園雪

潁水清

潁水清灌氏甯潁水濁灌氏族仲孺好俠良招尤武安
驕溢無辜不惜哉枉殺魏其侯需訟相承有深義戈矛
每生酒食際

戾園哀

蓬萊仙人呼不起儲君已到泉鳩里宮中桐木甯有諸
父求長生子求死覆轍誠恐同扶蘇斬說炙巫斯過已
痛絕壺闕三老言子盜父兵求免耳噫嘻乎悲哉格闕

空死賣履翁焚蘇何如族江充茂陵豈獨輪臺悔腸斷
湖城思子宮

薏苡悲

甯爲馬少游不作新息侯新息侯來西州破蜀下隴陳
良籌誅鉏先零若反掌交趾之役多繁憂駐軍浪泊移
軍西里仰視飛鳶跼跼墮水慷慨大志良可哀卧念平
生奚有哉吁嗟乎馬革裹尸言終踐珠犀薏苡何人辨

黨錮傳

始甘陵終李膺汝南南陽羽翼興俊厨顧及信賈禍張
成曹節甯賢人桓也書名同禁錮靈也下詔刊章捕誅

鉏善類弗問國脈長不長登龍怒虎翻成誤噫吁嘻宋
元祐明東林三君流毒嗟無垠東京二百年青史惟有
甘陵痛最深

雜詩

鶴脰不可短鳬脰不能長我思互損益損益乃兩傷元
機費揣測中夜心徬徨仰視天漢上牽牛詎服箱偉哉
棟梁器宜置無人鄉

客從遠方來筍輿過村舍被服輕裘裳安坐甚閑暇謂
我行路難入門卽悲陀起視徒隸輩泥湮沒不借兩端
絜苦樂奚啻晝與夜人生苟知足所遇甘如蔗

往者窺陳編天物戒暴殄下著十萬錢三公辱軒冕人
乳誇蒸狔佐食稱不腆張翰思萐鱸翩然去京輦驕淫
召天災隱憂實不淺卓哉遠識人守樸自黽勉

早餐亦已畢意行之南村曦光射地氣盎盎桃李園縱
橫百十畝中有好鳥喧主人爲余說茲園十餘春桃卽
遜綏山子熟佳無倫梨柯苦多厄時蟲恫厥身余聞發
深省此語當書紳樹德如樹木去蠹乃日新

落日下荒野白雲戀故山俯首盼澄波照見游子顏亂
髮垂過耳塵浣鬚眉間驅車日以遠故鄉何時還妻子
不足道知否高堂年顧視荷鋤子十畝方閑閑

黃河從天來東流不復西烏兔迭出入無時停羽蹏百年苦易盡况無百年期貌名諷詩書素餐愧盤后黑頭尙如此皓首將奚爲修名不早立中夜心慘悽

置我堂上行

干將雖利補履不如一錐狐貉雖美當暑不如綌衣人

不世用儒名奚爲

解一

梧桐之枝可以棲遲竹實離離可

以療饑鳳凰棄腐鼠烏鵲大笑之

解二

亦獨何爲置我堂

上考鐘發鼓騰豹胎膈熊掌使我默默不得語三百蠶

蠶壹千石黍歲寒相賞惟予與汝

解三

歲云暮矣嗟嗟蒲

柳其黃而隕芳華何有富貴不可求豈如飲美酒前望

古人寂寞身後

四解

秋夜旅懷

秋深殘暑尙崢嶸
小住空庭露氣清
斜月簾櫳孤館夢
涼風枕簟亂蛩聲
大江東去人千里
河漢西流夜二更
記得石城高會日
青溪一曲不勝情

九日春厓過訪

異鄉佳節罷登臺
獨對籬邊野菊開
舊國霜前鴻雁去
碧雲日暮美人來
笑譚湖海心千里
惆悵茱萸酒一杯
絮語莫嫌到深夜
重逢須及嶺頭梅

齋居有懷

甘寒釀沉陰晨霧淅如雨空庭悄無人鵲鳩相對語花
事遲往年強半淫霖阻曉起偶散步生意稍媚嫵緬昔
對牀人景物共延伫花開此徘徊往往月到午當時不
自惜一別載寒暑對景空含情道長誰寄與翹首南雲
飛來從公路浦

古意

爐煙欲盡燈含花停鍼獨聽譙樓擲隔窗寒月弄梧影
一枝兩枝當窗斜前宵鏡聽卜云吉咫尺不見仍天涯
錦衾已薰未忍睡萬一行人真到家

一亭王大歸里贈別

淒淒白日晚獵獵西風吹
哀哀鴻雁鳴蕭蕭黃葉飛
黃葉一何深鴻雁一何悲
蒼茫風日景併入愁人懷
之子歸故里送者何時歸
生平羈旅興臨風爲虛啼

奕罷

荒村無漏覺更長
棋子閑敲歷劫忙
人語漸闌燈欲燼
一庭涼月白如霜

晚泊一戢港

夕陽下遙空飛鳥去無力
機船真州西征帆此暫息薄
酒不成醉渺渺盼鄉國
坐憐新月生照見波如織

春日行

冰銷魚唼涼波肥木蘭雙槳朝暉暉晴雲不動凝琉璃
美人照影顰蛾眉大隄楊花如雪飛江南花早春日遲
天涯游子歸不歸

晚春客寓

客游如夢寐兀坐歲華新地少名花豔人餘舊友眞墨
雲愁永夜絲雨戀殘春芳草朝朝踏王孫迹未陳

秋夜書懷

蟋蟀動秋心乾坤入苦吟西風殘夢破永夜一燈深斜
月有微影寒砧無好音美人不可見惆悵歲華侵

夜雨漫興

階下何人到窗紗戰急風酒銷寒雨後春老客愁中幻
夢憑蕉鹿行踪悵雪鴻落花多少恨任逐曉雲空

漫興

久客成何事高秋復此辰青山塵外夢黃葉病中身印
迹泥鴻舊歸期社燕新關河吾已厭又作渡江人

蓉湖存稿卷之上終

蓉湖存稿卷之下

山陽盧 湧月江著 鴛湖王 相惜庵輯

歌風臺懷古

亭長歸來著錦袍大風一唱暮天高故鄉把盞心逾壯
猛士藏弓首重搔馬上功名三尺劍座中風物九秋濤
如何楚舞悲歌日兒女能銷意氣豪

記別

記別吳門三十年舊游風景尙依然綠楊陰裏山塘市
玉笛聲中畫槳船勝事如雲容易散華顛覽鏡劇堪憐
何當再續支笳興鄧尉梅花笠澤煙

途次王營訪陳生不遇

記得春深來綠楊舞飛絮如今又新秋梧葉下高樹日
暮天無風且渡黃河去

行年

行年四十逐飄萍早讀蒙莊任夢醒春水波光添酒綠
名山石氣爲詩青天涯肯鼓朱門鉞雲路誰窮皓首經
莫道廣陵音竟絕瑤琴終待子期聽

盆梅

春意益天地偶然露此中十旬禁朔雪數點報東風窺
管只如許巡檐誰與同一枝眞具體能冠百花叢

題滑我儂漁翁醉月圖

煙波釣徒天隨子扁舟日日煙波裏有魚無魚翁不知
且飲美酒篷窗底新月暗上楊柳枝蘆花瑟瑟涼風吹
涼風吹酒酒不醒綠蓑青笠權支頤爾也忘機同海客
白鷗作盟波作席醒看皓月醉臨風風清月白供吾役
我儂家住明湖濱別有懷抱難傳神須知此老逍遙際
世上風波愁殺人

河兵謠

黃河之水天上來洪湖東瀕趨蓬萊運道上下此要害
宣防調劑須奇才我昨經河洛河兵與我語今年夏徂

秋湖河幸安堵湖河安堵民歡悅其奈河兵衣食絕那
似前年去年時土方稽料皆金穴河流暴漲重陽候桃
北睢南不可救縱然運道無齟齬赤子沉災遭躪蹂河
不決河兵愁河旣決淮民憂民憂兵愁誰復論莫求治
法求治人到今猶頌潘與陳

靈城

匏居臺毀章華築卸甲莊西峙林麓危城隣近細腰宮
巫山雲雨迷金屋城中有湖湖接天宮中吳娃紛採蓮
列樹如屏波似鏡湖光分綠描嬋娟楚靈當日鴻圖擅
龍民耗財事荒晏問鼎雄心一旦灰重城永閉春風面

春風秋月不堪論
賸有漁翁來問津
鏡奩網得還拋棄
爲照當年歌舞人
竭來策杖荒城下
湖無滴水城無瓦
不須問訊伍家營
我亦吳門乞食者

秋日與芷江伯兄夜話卽言別

暫博連牀夜雨歡
天涯去住兩儒冠
饑雖驅我心彌壯
熱尙因人淚共彈
燈影紅添華萼煖
雲容黑閃劍光寒
老槐書屋須臾事
不覺髭華夢易闌

老槐書屋余與伯兄
髫年讀書處

西南地曠雲濤壯
風雨情深雪鬢彫
豈有關河疎雁序
竟無歲月共魚舫
蒼茫身世波千頃
潦倒乾坤酒一瓢
太息來朝又西邁
獨騎瘦馬度山橋

暨州道中

別有一天地山重水複中潮添寒港碧寺帶夕陽紅
浦人聲闐黃田歲事豐客愁渾忘卻一一數飛鴻

錫山感舊

歲月不可問江山空復情釣游如昨日漂泊此餘生
濁酒梁谿道荒阡楚國城黃泥橋下水嗚咽送行旌

夜坐

樹古龍虬攫天高河漢橫四圍雲澹沱一片月澄明
羣動此時息長空如許清草根寒蟋蟀爲我寫秋聲

秋夕悼王景之

秋氣驚侵骨秋聲不可聽
亂蛩吟砌草落葉打窗櫺
雨鬢先霜白孤燈入夢青
故人又衰謝寥落感晨星

秋日寓齋接惜庵書擬於後月過訪先此奉寄

訪戴眞吾願依劉歎此生
道存知已重客久俗人輕
有感蛩如訴無求夢亦清
何當來鄭曲樽酒話深更

潼陽過訪廣圃蘊山昆仲

白頭兄弟耐悲歡
翦燭開樽語夜闌
誤我詩書眞老大
傍人門戶總艱難
西風建業思秋半
北道潼陽踐歲寒
景物不殊人事改
鴈原話到寸心酸

景夫表兄
去年溘逝

七夕立秋登舟

同人爭向金陵去只我偏爲兩浙游萬古雙星此離別
百年幾度值新秋長風浩蕩看溟海瘦骨峻嶒怯舵樓
遮莫天涯重回首一舟贏得是羈愁

出清波門

南宋江山耿夕曛青衣洞外靄秋雲何當一盞西泠水
來弔錢塘蘇小墳

不寐

秋熱不成寐虛房耿長檠夜半羣動息促織東壁鳴人
世百年內鼎鼎無留行胡爲名與利終日勞其生攬衣
起獨步殘月窺前楹西風一杯酒聊復攻愁城矯首望

故國白雲方南征

塞下曲

馬邑龍堆路幾千成漢家烽火達甘泉玉門花柳無消息
金闕干戈有歲年自分李陵辭上谷豈知竇憲勒燕然
陳湯充國俱千古馬革何妨換墓田

秋夜枕上

蟋蟀空堂靜西風落葉深五更愁旅夢萬杵動秋心
作客閱寒暑敲詩憂古今時作讀史雜詩蕭蕭窗外雨和我白頭吟

卽事

峭寒庭院雨聲多
草長池塘水長波
燕子不來春又老
東風吹綠上陂陀

此生

此生活豈勝焦先
白首長裾東海邊
入洛陸機辭故國
登樓王粲負華年
絕無塵累鄉關外
賸有高歌酒盞前
巷口夕陽誰悵望
釋奴總角使人憐

謂幼子名寶

六月四日接淮弟手書卻寄

厚邱城西邵甸東
吾家令弟

見杜詩

游其中三易裘葛不

相見雙魚鴈墮心
忡忡前年我向浙
東去記得婁江停

權處沛然

浩弟字

見我哭失聲
十年骨肉嗟飛絮
我今移

硯來潼陽與子相隔天一方我歸故里子已去鞭絲驢
背同參商回頭叔父生存日苦讀慈顏憐弱質只今皓
首悲無成墓門松檟空蕭瑟念爾孤蓬淚滿巾雙親知
否飄零身雲外征鴻悵游子天涯芳草愁王孫誦君詩
句心如擣太息勞人眞草草書來紙短中情長一樣冬
烘到頭腦我苦饑驅君亦然他鄉何日對牀眠卻思返
棹叟江上風雨河橋分手年

秋日澗河舟中卽景與四農聯句

煙柳帶長橋寒潭半夜潮初陽芳草岸秋水木蘭橈經
濟餘詩卷乾坤入酒瓢青旗漾前浦倚櫂話漁樵

風急水湍流雲羅淡不收危隄藏野寺落葉打行舟客
路關河晚人家梁稻秋桑麻愧無分生計久浮鷗

談詩古人後誰見古人情滿眼詞華客傷心中正聲岐
途思老馬滄海幾長鯨寂寂孤舟坐疎狂此舅甥

我欲渡河去如茲良會稀幾年花下酒匹馬雪中衣老
境耽前夢孤篷戀夕暉中秋及重九相對莫相違

發舟與舍弟別

野色蒼涼歲月更扁舟曉日又長征危旌大纛賢勞甚
與制敝篋荒城老淚橫自分一生難薄宦有人平步得
府遇清卿白頭兄弟惟君在此去憑誰問死生

月夜

明蟾無厚薄一例下茅屋門前一株槐清陰伴幽獨此時萬慮空方寸清如沐時有微風來柴扉吹簌簌

寄沐陽王慈雨

大江東奔日西馳人生遇合不可知君行萬里上霄漢我老一經守枯枝憶昔癸酉秋同作金陵游爾我不相識落落兩沙鷗萍蹤一朝忽合并攜手共坐城西樓酒酣耳熱語不休放談直欲凌滄洲旁人聽之不解作何語熟視往往瞪雙眸嗚呼良晤苦不常走也桑梓君邊疆君取青紫如拾芥指日奮袂登玉堂玉堂迢迢天北

極黑頭卿相應努力因君更憶我故交三山詩人顧秋碧

春日 and 四農見懷之作

日日風和雨逢春不見春餘寒欺瘦骨殘夢戀詩人墓
上草皆宿

謂墨泉
好山輩

溪頭柳已新何當南墅去攜手步芳

辰

曉起

林莽晨露泣露氣襲我襟百蟲鳴不已聲聲聒我心其
時日欲出朱霞破重陰金蛇掣天街火輪飛遙岑喬木
亘東北蒼蔚分淺深扶桑與若木豈必東海溟壯觀契

幽賞靈臺絕塵侵咄咄褊褊子黑甜方在今

邱甥至有感

阿姊幾年逝孤甥此日存饑寒霜滿鬢風雨水當門時甥
被歎我全家客憐渠兩眼昏荒村人迹絕相對倒清樽

酬四農見懷

大樹易招撼韓蘇皆有之宮原逢磨蝎性自狎伊尼風
雨雞鳴際江河日下時苦思策藤杖來踐鄙夫期
老屋溪頭住秋來病不蘇滿天只風雨徧地是江湖岸
窄幾家有門閑一事無偶然明月下獨酌念吾徒

蓉湖存稿卷之下終

月江先生山陽諸生少以能詩鳴垂老不遇又甚貧旅
食輒數百里外詩益工境益苦矣生平宗漁洋鏗訇陶
冶遺貌取神道光庚寅先子選刻國初十大家詩延
先生與借園師分任編纂而先生衰病日甚風雪遄歸
遽至不起可哀也夫其集爲阿甥潘四農先生所手訂
茲錄其尤者於左世愚姪玉襲之謹跋

存堞

稿景

軒

堞影軒存稿卷之一

山陽李續香少白著 鴛湖王 相惜庵輯

擬古

昔傳丹山穴有鳥巢其旁問鳥何所名厥名爲鳳凰偶
感六英舞時在千仞翔舉翼時一鳴鳴時何鏘鏘衆鳥
被羅網弋人行見傷任彼鵬鳩笑託身在高岡

莊生游濠梁獨知魚之樂此言雖取譬說理實鑿鑿大
造功瀾淪下察淵魚躍人生宇宙中莫漫受牢落解悟
頗自得悠然領大略若非貪釣餌安能供鼎鑊

送春

隔院遙聞杜宇啼江南芳草路萋萋一鞭人在斜陽裏
賸得餘香襯馬蹏

一灣清水繞吾廬明昧光陰晝不如小立風前頻悵望
最傷情是落花初

春色三分賸一分無端流水浸斜曛豔陽時節全孤負
屋角空留滿甕雲

憑闌叉手費疑猜煙月揚州夢正回最是知情新燕子
銜泥猶帶落紅來

桃李陰陰曲檻邊平分風月可人憐飄零細雨愁無那
綠戰紅酣又一年

芒屨竹杖幾勾留紫陌笙歌尙在不猶是惱人眠不得
勸君莫上望春樓

題壯悔堂集後

株連鉤黨恨難銷馬阮紛紛又賜貂公子閒情酬北里
書生冤獄起南朝囹圄愁聽黃昏雨臺榭魂依白下潮
一紙留都防亂帖禍機更比左兵驕

夷門冠蓋不尋常底事堂名壯悔堂花月飄零歸浩劫
江湖哀怨付文章雄才竟使隨蓬轉奇氣何嫌涉弩張
想到秦淮舊知己蛾眉早已禮空王

贈黃秀才

以嬰

薄暮出門望蕭然涼氣侵明月入我牖清風吹我襟忽
見故人來悠然怡素心抵掌一長嘯長嘯還高吟君子
發壯論堪爲座右箴人生無百歲莫負此光陰光陰不
可負嘯傲當山林我欲尋月窟月窟雲深深我欲問桃
源桃源路沉沉神仙總虛誕富貴空驕淫何如我與君
隨時一招尋怡養在性天乃爲真知音彼哉管與鮑所
重惟分金

鍾吾八景

宿豫早春

東風解凍日遲遲宿豫輕寒漸可支二十四番猶未報

鄉人齊唱踏青詞

峒嵒清曉

峒嵒峯險路難平曉色嵐光分外清
草上露華看半溼
采芝僧繞石橋行

倉基蓮唱

水近倉基說石家
拏舟幾度采蓮花
綠珠墮粉歸何處
樓下烏烏起亂鴉

白鹿漁歌

白鹿湖邊泛碧波
老漁獨坐著漁蓑
修鱗釣得沽新酒
欵乃遙傳醉後歌

龍泉夜雨

誰噴水氣湧龍泉
千尺清波拍遠天
蕭寺夜鐘初動處
飛來瀑布半空懸

馬陵秋月

馬陵道上接清秋月
影分明向水流
三五團圓金井冷
梧桐瑟瑟起離愁

草堰耕雲

一犁春雨足春芸
草堰家家試犢勤
幾箇老農相聚語
秋來但祝稼如雲

梅塋煮雪

梅花村裏漾寒光
玉屑梢頭分外黃
倘得故人重見訪
好儲晴雪沁茶香

詠懷

有懷投筆竟何爲
少壯休教老大悲
身健猶勞慈母問
家貧只許故人知
癖非易去因呼酒
債不難償是和詩
莫把逢年思別計
十年已悔讀書遲

雪夜招靖

溥

連宵寒氣重呼酒
且銜杯檐雪隨風
入瓶花帶凍開渾
疑涼月到可有故
人來一權前溪去
休教鼓柁回

望成盥蓀

春風吹遍楊柳綠春波漠漠煙水曲春到江南人不來
極望空穿千里目去年快讀寄我書諄然有約淮之壖
計日如年屢屈指猥以他事來鍾吾先生僑居在此地
此去何難見面易那知祖述先著鞭行李早逐桃花騎
匆匆十日歸去來柴門思爲故人開歲云暮矣不可見
中宵起無腸九迴淮水滔滔日往復晝夜蒲帆千萬續
隔年良友何不歸望江南兮隔江北

卽事

野水四五尺黃鸝三兩聲白雲樹外合明月天邊生此
際有真樂斯人無俗情春風若解事隔院調銀箏

少年行

五陵年少馬蹏忙
綵帶輕裘意氣揚
揮手玉鞭聲叱詫
驚飛三十六鴛鴦

翠微亭

危亭百丈聳山頭
北望長江一線流
指點片帆飛渡去
水天連處是瓜州

莫愁湖

十里山光接水濱
殘棋收拾悟前因
因風流占盡平湖秀
不讓英雄讓美人

病中雜詩

淮南地卑溼所苦無山林入夏炎暑酷水氣時相侵譬
如不羈馬所在留蹠滫何當上喬木經訓爲參苓
團扇如滿月製以鮫人綃五月六月間隨風常動搖何
爲輕棄捐如彼黃葉凋寄語熱中人安得風蕭蕭
美人怨遲暮君子端始基力學必逢年筆耕當及時魚
鹿無所成胡爲日孳孳光陰惜寸分白駒去如馳
籥籬有小鳥飲啄皆依人喜無矰弋虞聊以寄此身豈
知天地寬牢籠非其倫鸞鳳雲中翔羞與燕雀馴

薄命妾

薄命妾妾命如紙妾心如鐵妾心如鐵郎不知有女如

花郎心悅嗟嗟薄命妾夫婿輕離別一解離別復何傷

歸期客路長秋風秋雨木葉黃賤妾雖苦不過空房夫

婿雖樂猶在他鄉二解心堅如鐵命薄如紙譬彼衣裳

綠衣黃裏妾身未分明姑嫜脫簪珥妾身既分明白頭

永自矢三解妾重白璧郎重黃金黃金揮霍如飛塵美

人贈郎七絃琴燦爛兮角枕鮮明兮錦衾繡糠誼薄山

海盟深黃金之故可以同心四解白璧不能多黃金不

能少妾貌不如人妾心獨皎皎不敢望郎歸甘使青春

老但願美人心與郎永相好五解

初夏卽事

雨過一庭綠好風時入簾靜中看冷暖味外辨酸甜顧
影雄心在懷人別緒添年來交似水漫道食無鹽

天倫多樂事晨夕侍慈幃弟幼歡聯被兒嬌喜著緋心
懷蓴菜美手種豈花肥一曲琴聲靜浮雲任是非

題成盥蓀畫簃

秋山如亂雲石徑稀人跡隔水望伊人人家在深碧

秋日客中懷人

月色淡如此美人不可尋荒城數殘漏永夜調素琴落
葉醒鄉夢秋聲驚客心與君一攜手爲我清塵襟

雜詩

樵子日在山山中多虎豹漁人日傍水水底蛟龍嘯漁
樵塵外人入險防傾倒况彼世網中陷阱機何奧丈夫
志聖賢所重在懷抱但聽漁父歌莫受樵夫笑

魚游滄海中不知滄海深廣廈營初就燕雀懷好音非
緣物性殊習慣適我心緬彼百尺桐龍門何森森高岡
勢突兀時來九苞禽處世貴遠大安能與浮沉

寶氣不終隱光乃冲斗牛世無博物人拔劍將安投鋒
鋌莫輕試拂拭藏吳鉤縱被土花蝕有時鳴青鞵亮哉
烈士心不惜千金酬

展讀張風山師漸覺人情異之句感成四律

漸覺人情異書空喚奈何黃金誰買賦白雪不成歌冀
北空羣少終南捷徑多豈能如脉望經史費蒐羅
漸覺人情異誰教道義親曬禪能免俗拔劍不祛貧有
恨頻搔首無成易反脣知交多冷落裘馬眼前春
漸覺人情異時占履虎危精明宜守拙忠信轉生疑夢
覺花開後心平酒醒時世途翻覆甚怪底悔情癡
漸覺人情異方知碌碌徒矯廉陳仲子倚勢霍家奴招
隱防山鬼參禪戒野狐會通宜聖意觀行是今吾

詠懷三十律

身世飄蕭類轉蓬愁城難仗酒兵攻性情磨鍊風塵裏

膽氣消除感慨中
吾舌尙存偏口吃
人言無信任心聾
男兒三十猶如此
丁字何如兩石弓

原知文史足三冬
爭奈歌聲唱懊儂
風月枉教尋杜牧
神仙空自憶王恭
夢中說夢藏真鹿
奇外無奇好假龍
百感茫茫誰共遣
敢從江上怨芙蓉

分門別戶久紛囈
血淚全枯恨滿腔
大雪三更欺病鶴
朔風一夜怯村厖
吹殘蘆管寒侵塞
望到冰花冷透窗
羨煞披裘來大澤
竹竿垂釣富春江

庚申誰解滅三尸
空學梁鴻賦五噫
小慧于今慚博奕
恒心自古讓巫醫
奈何競唱公無渡
如此原知叔不癡

座上有人羞碌碌處囊無用是毛錐

顛短衫長心事違食言依舊不能肥飢來驅我貧還病
壯不如人是亦非涸轍枯魚空自躍牢籠小鳥本難飛
故人近有游山約同敬禪關白板扉

蠻爭觸鬪總遠廬牖戶綢繆尙侮余刻楮難成青玉案
開編誰寄紫泥書布衣珍重綈袍贈鐵金躊躇儋石儲
枵腹空談本無補從今翻悔帶經鋤

顏唐故態笑狂奴心計頻年漸覺麤作伴出門同鹿鹿
有時擊缶獨烏烏才能斫地歌原壯事到憂天智亦愚
太息勞人甘瓠落真將生意問榮枯

劍插腰間拂鷓鴣吳鉤三尺費提攜千重愁緒心如結
五色情絲目易迷壯歲功名消日月故人恩誼判雲泥
不如歸去聲聲苦怕聽深林杜宇啼

鴟林幾度好音乖惆悵豐城寶氣埋不信風流成放誕
儘教遊戲學詼諧囂囂衆口原無那耿耿憂心別有懷
鍊石荒唐緣底事補天千古悔靈媧

姓名依舊委蒿萊慚愧吾家倚馬才寸鐵不持生計拙
千金已去笑顏開生成傲骨人如菊領畧寒香夢到梅
同學少年知我否名心雖死未全灰

茫茫誰與指迷津猶自行吟泗水濱知我空勞天下士

相予且閱眼中人胸無城府何妨熱座有賓朋不厭貧
大笑出門豪氣發每因懷古淚沾巾

任他世網日紛紛把盞相看耳不聞未必窮途逢阮籍
翻因下第愧劉蕡詩書有福還同契筆硯雖封不忍焚
閱盡繁華歸淡泊年來怕讀送窮文

空教詞賦擅西崑舊雨重來仔細論憎命文章徒立說
依人事業莫辜恩偶談絕學心如醉不負貧交道自尊
願向萬山深處住蓬廬靜掩謝繁喧

東風吹遍漏痕乾耐冷渾忘白屋寒枉道未能從俗易
著書不了守成難孤雲野鶴山中住香象羚羊壁上觀

夜半燈前頻起舞從來相劍讓吳干

湫隘偏教近市闌妬他僧占六朝山幽居未卜神先往
覺岸初登夢亦閒銀燭三條供點綴丹梯萬丈許追攀
有懷投筆慚宗慤一卷吟成手自刪

膏腴典盡淚潛然失算難爭一著先賸有詩書存手澤
好將忠厚守心田風塵何處無知己草莽傷懷不象賢
往事那堪重回首春風秋雨十年前

荒齋鎮日總無聊小飲思將濁酒澆抱璞未成真氣短
投珠屢暗倍魂銷安貧自覺囊中涸見賞誰憐爨下焦
正是孤懷無著處又逢雨晦與風瀟

行吟鎮日屢推敲不必書成廣絕交我輩登臨容嘯傲
人情冷煖任譏嘲絕無佳境償甘蔗多少浮名累苦匏
驚覺夜來花事了流鶯深護一枝巢

百尺元龍意氣豪求田問舍亦徒勞纏身有恨生荆棘
彈指何人報棗糕多露難行防雀角順風不定到鴻毛
我思未見空惆悵對酒當歌首重搔

慚愧冬烘亦設科文章心事竟消磨頻年落拓逢山鬼
鎮日酣呼引睡魔秋老江南風信冷夜深窗北雨聲多
單衣短布尋常事羞向街頭扣角歌

閒隨野老話桑麻門外虛停問字車未必羣雞能立鶴

不堪彩鳳竟隨鴉十洲煙島荒城隔萬里雲山遠樹遮
莫唱大江東去曲驚心鐵板與銅琶

書生無策治河防釜底危居類處堂留得衡茅棲澤國
虛談魚米足江鄉寒酸十口謀生急辛苦連年寄恨長
不用披圖思鄭俠可憐墳首是牂羊

前路多岐又問盲迷途難返不勝情酒人罵座心先怯
租吏登堂膽欲驚庇廕萬間空有願坐荒一事竟無成
頭巾破爛文章賤到底微名誤此生

門多剝啄不能扃索債催租側耳聽憾事寄書遲未達
閒愁中酒醉偏醒蒼茫獨立思千古感慨中年老一經

寄語故人休問訊鉛刀未許敵青萍

浮雲過眼總蒼騰強學逢迎我未能蝸舍幸無投刺客
猊壇輸與寫經僧難求靈藥三年艾誰解寒心六月冰
天上石麟成往事當時原不讓徐陵

剪刀自古快并州難剪千絲萬縷愁磨墨已穿鸛鴒硯
典衣并少鸛鷀裘書多誤處頻燒燭劒到尋時竟刻舟
百不稱心翻快意底須微利逐蠅頭

疾不能言口欲瘖嘵嘵誰肯惜予音孤兒無福尋真樂
賤子多愁入苦吟忻慙悲愉原是夢淒涼唯殺竟何心
傍人笑說從前事揮霍羞誇十萬金

層層縛束繭如蠶桑葉傾筐昔未諳半世累人惟飲食
一生誤我不癡憨拊膺怕聽蟬聲急雄辨須防虎視耽
今日方知蜀道易巖崎堆阜又何堪

尺木難支四壁跼江鄉今擬築茅檐絕無奇技因偷贖
爲避狂名始學謙文字千言慙獺祭儒生一介笑雞廉
世情多少求全毀收拾雄心付黑甜

回頭是岸望歸帆三徑荒蕪草未芟閱盡人情忘冷煖
嘗來風味總酸鹹閒愁鎮日供茶竈多病終年荷藥鑱
吟罷新詩無限感淚痕仔細認青衫

題陸春堂讀書秋樹根小影

四時之氣秋最清天高氣爽秋雲平秋山當戶勢鬱勃
秋樹屈曲枝柯橫我愛秋聲清且肅唧唧秋蟲伴夜讀
後來秋士空悲秋秋心誰解秋聲續江南有客通行藏
辦香心事祝歐陽玉宇無塵科頭坐秋風羅袂生微涼
坐看秋雲出林表萬籟無聲絕紛擾手執一卷思古人
上下千秋入懷抱把詩吟向九秋天蕭蕭秋葉裁吟箋
黃葉馬蹏秋色晚春堂偶得此七字同社爭誦之南華秋水眞蹏筌
吟悟徹靜中理六經三傳廿一史誰謂古今人不同六
一居士天隨子年來與我比屋居爲我新題深柳圖披
圖欣賞掩卷笑爲愛秋光同讀書

春夢

落花啼鳥伴春眠
風雨聲中夢正圓
縱不分明還記取
了無痕跡易纏綿
驚回一枕鶯初澀
悟到三生蝶亦仙
莫以韶華付流水
揚州憶否十年前

題王惜庵落花蝴蝶圖

年年三月送春歸
花使翩跹著綵衣
記得江南芳草路
落紅如雨作團飛

誰題綵筆繪蘅蕪
活色生香入畫圖
管領春風花世界
有人清夢寄匡廬

堞影軒存稿卷之一終

堞影軒存稿卷之二

山陽李續香少白著 鴛湖王 相惜庵輯

擬獨漉篇

獨漉獨漉枯腸枵腹短布單衣肝不蔽足 一解 仰觀太

空白雲蓬蓬蜿蜒虬龍出沒雲中 二解 南山有石良工

鑿之美玉在璞石斯錯之 三解 既優既渥印則力田既

種既備印則逢年 四解 富貴非泰貧賤何害思危爲安

思患不敗 五解 雖有杜康憂不能忘斗酒醕我念我糟

糠 六解

題松江范秀才 學誠 望雲圖

游子事行役秋風一夜生鄉心付淮水歸夢繞江城紅
樹迷前渡青山憶舊盟登樓無限感况復故園情
落日下寒林浮雲動客心披圖空悵望到此倦登臨將
母思歸切知君寄慨深吳淞春水滿早晚聽鄉音

感舊

往事從頭說滄桑變態多中年生感慨豪氣半消磨入
口甘薇蕨傷心廢蓼莪修名慚未立前路竟如何
省識貧非病貧因病轉增枯腸填塊壘傲骨露崢嶸彈
鋏人偏笑吹竽我未能感恩與知己不覺淚成冰
朔風吹老屋寒雪又交加愁重詩難續囊空酒不賒幾

人憐范叔何處覓侯芭到底微名誤虛停問字車

飛騰難計日斂翼嘆淹留痛忍窮途哭甘添壯士羞座
中悲賦鵬戶外怯鳴騶閱盡交情後却須水石儔

用盛子履師 大士 贈成監蓀原韻賦呈

詩酒生涯古誼敦向隅我獨哭聲吞貧交耐久同歌泣
寒士酬知入夢魂落絮粘泥雙屐滑暗風吹雨一燈昏
無成空負便便腹塊壘填胸手自捫

和盧 生 感懷韻

著書坐破一氊青雙裏龍鍾涕泗零名到奇窮翻不死
天留大夢忍孤醒吹簫鳴咽傷心訴擊筑淒涼束手聽

堞影軒存稿 四 卷之二

此曲料應歌者苦新詩空寄草堂靈

蒼茫蓬島隔塵寰擬向羣仙覓大還無可如何難塞海
有誰相信是移山十年累我青衫舊一事輸人紫綬殷
今日爲君發長嘯揮毫直欲破天慳

三十無成暗自傷青天白日去堂堂蔗漿不熱寒應啖
藥樹如甘苦亦嘗未肯折腰求斗米那堪眯目播箕糠
廣平一賦梅花後千古能柔鐵石腸

聽罷新詩百感生牢騷心事和難成黃花不負前年約
白屋長聯此日情捐介君能兼放達蹉跎我已誤聰明
昨宵細讀哀吟句殘月當門夜四更

雜詩

涼風上古木落葉下秋階美人感遲暮遣我避寒釵感
子情意長鄉澤不忍指非爲玩物計聊慰平生懷

出門遇顯者意氣軒以昂僮僕策駿馬可憐生輝光少
時曾同學胡爲相遺忘遺忘亦人情去去庸何傷

歸家顧妻子言笑大喜歡不憚操作勤童稚咸悅安予
季叶琴瑟靜好無摧殘太和溢真氣此樂良獨難

堞影入吾室門向城南開一二素心人晨夕樂追陪願
言沽美酒大笑傾金罍醉卧黑甜鄉絕勝避債臺

淮干晚眺

隄影逼城頭檣帆落日收
亂鴉團遠樹瘦馬立官郵
感慨自今古英雄此釣游
行行一回首春入譙花樓

秋草和盛子履師韻

短籬猶有傲霜枝三徑荒蕪減舊姿
曾憶西堂尋夢夜忍忘南浦送人時
風尖大漠飢鷹疾霜壓平沙落雁遲
坐地聯吟纔幾日不堪重讀少陵詩

贈陳蔚廷丈

丙

曹唐仙去後腸斷白門秋
每見孤兒日難禁雙淚流
心交悲死別手澤動生愁
能讀父書否傷心問太邱

和友香

弟閒情同盛

徵典作

本來燕趙勝齊梁
衫子輕盈愛杏黃
不信名花定傾國
可憐活色與生香
銀河耿耿橫今古
金綫年年壓短長
一奏大羅天上曲
佩環聲曳白雲忙

仙子何年降藐姑
羅浮有蝶化春駒
情絲未必同蠶繭
花片還能護鶴雛
酒盡千尊凝琥珀
愁消十斛抵珍珠
尋常拾翠渾閒事
萬朵夫容映滿湖

木樨香落女郎家
玉斧鋒鉞遜莫耶
日下霞裳能引鳳
人間雲鬢浪塗鴉
相思南國江帆冷
何處東風御柳斜
回首瑯嬛真福地
經冬猶自豔琪花

花樣如今太斬新
大家不學捧心顰
蓬山未許風雲隔

珠樹還宜雨露均
淘出香泉能汲浪
棄餘脂水竟成津
瓊樓玉宇前身住
輸與蓬萊小謫人

游仙疊前韻同盛

徵璵作

泥金爲屋玉爲梁
十二屏風玳瑁黃
濃露釀花能作酒
煖風吹樹總聞香
三霄雲錦紅絲纈
五色霞衫翠帶長
平揖星娥招月姊
者番送別莫匆忙

聞道江妃喚小姑
潮頭白馬立神駒
釣來尺鯉都銜尾
飛過雙鳬欲化雛
斐几芭蕉凝碧玉
瑤階天竹綴紅珠
欲尋柳毅來時路
煙水茫茫萬頃湖

彩雲朵朵落誰家
凝望非耶亦是耶
芝草茁時棲小鹿

珊枝亞處聚靈鴉低窺露井西風緊細數星房北斗斜
還向蕊珠官畔過阿摩永夕散天花

侍兒結束茜裙新歡笑原來不解顰月下芳容雙靨麗
洞中花氣四時均敢將神女思貽珮多謝天孫爲指津
是夢不知還是幻曹唐原是過來人

憶黃以暇

塵容終日不能閒強欲迷人學閉關忽憶城南黃叔度
人間亦自有深山

寶刀難斷酒難澆如此愁懷未易消何日與君歌一曲
登樓同看大江潮

讀盛子履師貧士行感呈四律

消除錢癖薄泉刀散盡千金氣不豪
僕病未能宜落拓臣飢欲死敢牢騷
心久鄙王戎李傲骨惟甘仲蔚蒿
自笑楚狂真乞相酒酣那肯餽人糟

杜門謝客亦尋常艱苦頻年已備嘗
痛飲滿腔餘熱血哦詩鎮日索枯腸
世情莫怪多翻覆時忌從來是倔強
差幸家貧拙求富交游不雜學孫康

平生踪跡證苔岑往事茫茫不可尋
冷署天教成吏隱清修人合傳儒林
愛才如命垂青眼結客論文洽素心
爨下焦桐偏入賞樗材何以報知音

短衣長劒竟如何寒餓終朝感慨多不信美人受謠詠
可憐佳日總蹉跎十年已醒封侯夢一曲難忘相士歌
我有深恩酬未得敢將壯志儘消磨

小游仙

雲環霞珮曳丁東閒倚桃花嚼碎紅咳唾化成香世界
一生清福住花宮

精魂石上證三生金屋人間浪得名記得蕊珠宮裏事
玉簫聲接鳳簫聲

麻姑曾向蔡經家狡獪能開頃刻花鳥爪親將麟脯擘
截肪片片玉無瑕

平視星房的的圓纔知身到大羅天天孫近日停針線
誰貸黃姑十萬錢

勞勞亭

此地黯然別離情相與長無人留過客終古對斜陽祖
道杯難盡天涯草不芳至今亭外柳青眼爲誰忙

金陵懷古

東南王氣已全消直下長江湧怒潮事業幾人爭將相
興亡舊恨付漁樵空教天堦留千古未必山靈憶六朝
只有秋聲增感慨白門蘆荻自蕭蕭

謝皋羽竹如意歌

崖山兵敗宋室覆丞相騎鯨去不復忠魂直上凌雲霄
義憤傳聞謝翱哭當年慟哭登西臺陰風慘澹生蒿萊
手持一枝竹如意擊石石碎天地哀石破天驚亦奇事
晞髮山人墜血淚零丁洋與嚴陵灘古來總是傷心地
江邊草木搖風腥鼉鼉匿跡魚龍聽哭聲震動氣嗚咽
空山從此無冬青感恩知己心不死萬古茫茫一江水
號鐘零落玉帶藏斷竹續竹乃如此此物此志傳千秋
幕府姓氏千秋留霜寒月黑四山碧至今英氣飛蛟蚪

哭楊振錯

楊君不可死鬼伯太披猖奪我故人去增余過客傷青

燈悲少婦白髮痛高堂天意真難測招魂下大荒
平生重然諾肝膽感人深掃盡浮囂氣常懷拯救心親
朋悲執紼婦孺淚沾襟太息增嗚咽高風何處尋

閏月十日新霽見月陸大將返宿遷月下話舊作
月色久不見時聞風雨聲陰雲屯澤國積水抱荒城薪
米頻增價寒酸獨繫情清輝忽開朗把酒話平生
故人戒行李秣馬束征鞍此夕不知冷中天好共看高
懷淡若菊清氣靜於蘭庾嶺南枝早重來訂歲寒

感事二律

自築攔黃壩長淮日以深隄防留善策宣洩寓精心旱

已通芻粟原非惜帑金文襄遺疏在傳誦到如今
黃水入秋大河心一夜高沙流能撼岸浪急不容刀陸
處亦艱阻人聲常怒號冬初興力役報

國此賢勞

和舍弟友香九日城南觀菊韻

離落有寒意經霜冷蝶飛高人宜石隱傲骨笑秋肥屋
繞黃花徑門迎白板扉行行微雨散一笑對斜暉

南郭得幽趣閑閑十畝桑故交如此淡佳色不因香九
日結高會雙襟怯晚涼何時復攜酒相賞引杯長

和黃以嘏飲吳氏酒樓原韻兼柬王明經

彬

終年竹屋小如舟擁絮酣眠當卧游十載故人通遠夢
一庭落葉報深秋相逢且放平湖櫂有約同登近水樓
莫問比來生計拙舉杯豪飲合相酬

不向秋風喚奈何任他世路有風波到無求處心能定
但得閒時樂便多黃葉聲中尋舊侶青山頂上記高歌
荒園別有蕭疎景雪夜還思載酒過

望渡船 憫災黎也

田不得耕屋不得住老弱隨洪波強健踞高樹樹頭三
日無乾餼奄忽可憐命難固有時一失足骨肉那能顧
聲嘶力盡可奈何非死非生安所訴忍須臾渡船渡望

眼穿朝復暮

篙師尊 痛掠賄也

篙師狎洪濤如足履平地掠人性命難殺人性命易有
錢者生無錢者棄不畏官不畏吏更向中流括餘利嗚
呼或質衣與裳或脫簪與璫所欲不滿淵中墜君不見
婦人頭蓬葆男子赤肩臂渡河之人眼流淚沽酒大嚼
篙師醉

新城哭 哀死亡也

襁負來新城貼地冷如鐵一夜風鼓三尺雪雪沒蓬廬
風吹折中有小兒夜啼血飢膚冰涼骨作熱痘瘍旋作

小兒孽丈夫既生離兒女復死別生離倘重逢死別不忍說傷心豈獨古戰場此地三更哭嗚咽

安人心 美郡令也

一騎城外來驚呼遍街市言水不可當居民速遷徙走馬直入大官門力勸大官走避水大官有老親應之聲唯唯守令曰大官公去亂將起大官讀書人聞言有至理安堵乃無譁守令蹶然喜郡伯富邑侯李民之父母良有以

城門開 諷出亡也

出城多入城少禁鼓雖敲難禁人城門老兵坐到曉貧

者無金錢空向城闔繞富者厚筐箱肩挑何擾擾大船
橫河干計較到微渺東船夜有賊西船頻震掉智謀日
以拙心膽日以小可知奴輩利吾財城外何如城內好
天寒月黑遄歸來前路荏苒徑幽突

不死樂 刺胥吏也

良民亦何辜橫遭大水虐黠吏亦何幸竟得不死樂黠
吏豈獨身不死更向飢民恣搜索民無全家吏有餓壑
坐取賑錢飽囊橐保甲爲爪牙散處村與郭雖有好官
人安能遍土著誅其尤者膽乃落

捐賑苦 紀勸施也

催租吏猛於虎勸捐吏懦於鼠丈人坐華堂左右羅殽
醕吏來前致詞長官勸施與云是同鄉人濟困爲美舉
吏言未竟丈人笑死者死矣生者已安處不欠糧米錢
安能奉官府吏與丈人大齟齬丈人那識飢寒苦

擬東坡游靈隱高峰塔用元韻

寒餓膺塵網飢驅束輕裝我來靈隱寺松柏生微涼攝
衣登浮屠但聞旃檀香齋魚粥鼓聲清磬與之長下界
如鋌鹿高峯恣相羊側身視飛鳥飛鳥皆下翔賦命太
偏仄身世何茫茫年來持殺戒蔬筍充餽糧禪味良足
悅高吟踞僧牀九闌不可通感此心傍徨淨域豈吾願

臣心如冰霜

題盛子履師人日題詩圖

靈辰憶辛巳草堂設杯酌
朗抱無俗情雅歌有真樂
春風吹又來浮雲去無著
屈指年已久回頭日如昨
嘉會良獨難大雅幾時作
世事多變更虛名半索寞
聚散如搏沙光陰等飄繹
七載失舊歡五君快新約

圖中爲郭大慶江丈

青汪員外敬汪居士鴻及先生也

東南壇坫開珠璣咳唾落豈以誇譙

游而無所寄托文史追班揚
功名小衛霍君子有孤標
翛然比松鶴故人如晨星
慨然感邱貉忽發千載心
敢辭一言諾氣讓元龍豪
體笑仲宣弱題襟附青雲
有筆

不能閣

題子履師所作胸中邱壑圖

昌黎苦作南山詩千態萬狀無不奇是其奇氣弗可及
寓書於手人難知後來畫工不能畫伸紙縮筆空盱眙
模範山水但形似真宰淪沒夫何爲銖積寸累笑餘子
筆酣墨飽推吾師腕底煙雲恣變化胸中邱壑羅嶸崎
詩情畫意各超絕不許俗士窺籒籀有時興到一拓筆
羣山萬壑如奔馳何論荆關與董巨如作篆籀窮邈斯
奇趣逸致旣蒼古濃塗淡抹何淋漓乃知品高性情潔
見諸外者中所施我亦性耽佳山水塵容俗狀面目顰

人海波瀾幻復幻世途偈仄岐中岐鍵戶欲適四時樂
築室苦無三徑資得觀此圖亦大幸塊壘消盡心神怡
河嶽襟懷不我棄一邱一壑相追隨

秋柳

不堪腸斷灞橋邊四望蕭條淡暮煙遠道懷人感搖落
荒亭送客悵纏綿春風游騎思前度落日寒蟬憶去年
兩岸離情太酸楚新詞誰唱柳屯田

攀條人記大刀環塞上封侯尙未還浪說鶯黃迷遠水
竟無螺黛點遙山江頭瑟瑟千株冷牆角垂垂一樹彎
羌笛誰家托幽怨西風偏度玉門關

翠眉深鎖感韶華曾拂旗亭油壁車舊恨魂消金縷曲
閒情望斷玉鈎斜十分冷落同蘆絮一樣飄零到荻花
燕子欲歸人又去沈寥天氣噪寒鴉

流水無情咽板橋平原依舊酒帘飄林空雲鎖愁千疊
隄遠痕生路一條青粉高樓驚夜雨白門古渡打寒潮
莫將往事悲萍梗多少興亡繫六朝

讀彭兆蓀地慳片土安狂客天與長貧付好詩之
句棧觸於中演成五古

茫茫六合中俯仰一身寄歲月既長徂鬢毛亦漸異我
生同鮮民出入墜涕淚常恐令名失重貽先世累學殖

日荒落知交半遐棄局踣不自適高厚負天地感此摧
心肝平生果何事

人雖蝼蟲屬萬物難躋攀本心一以失物靈人冥頑世
路豈真險造物何曾慳波瀾翻覆生覲面無歡顏君子
慎安樂入世多憂患立志苟堅定匹夫可當關

涼飈忽然至落葉空中翔春去幾何時芳菲難久長可
憐園中柳顏色先秋黃峻嶺生孤松歲寒鬱蒼蒼東籬
有佳色殘枝傲嚴霜賦質倘柔脆得志休猖狂

壯年不再少光景大可惜苦無一枝寄僑居若過客築
室與道謀無成亦何益人生無百年湫隘自足適求田

與問舍余懷久冰釋所期示周行不敢曠安宅抱此區
區心仁里慎所擇

字難諧雌霓名不識鼯鼠渺見寡知識聚訟半齟齬藏
修君子儒秀不匿野處如農警越畔如庖戒越俎學術
苟不充天姿枉付與躡等夫何爲不如循其序日積而
月累沛然莫能阻少許解貫通絕勝多多許

驅車適東郭道逢賣馬人云馬日千里驅策轉逡巡窮
途乏苜蓿局促氣不伸驚駘得豢養輝煌錦鞍新騏驎
不得志主人日以貧長嘶當風立誰爲九方甄

鳳凰不可斂麒麟不受羈品類雖有殊隱見同其時世

人少卓識腐鼠可嚇鴟所爭在細微牛後與雞尸緬懷
張茂先雜誦勵志詩澄懷發遐想上下千古期

題毛秋伯先生出塞圖

片檄能生宦海波投荒萬里荷雕戈

九重竟下還鄉詔一曲猶傳出塞歌廉吏羈孤相識少

騷人遷謫爲情多師門曾話湘潭獄

甲申夏日曾聞周石芳師話舊

覺明珠薏苡訛

戎馬長驅絕域來解鞍重見講帷開等身著作名難朽
回首弓刀事可哀秋雨聞笳如隔世春風入座獨憐才
桑弧蓬矢男兒志珍重新雛集鳳臺

酬高郵王孫用謝康樂還舊園韻

薜蘿一相遇，飄忽近十年。君詩益精進，可以藏名山。才
長體不弱，先哲邁仲宣。遐想托江樹，奇氣凌雲煙。馳驅
範正軌，不爲時尚遷。立言得奧旨，舉止無尤愆。羈孤有
同慨，翰墨締舊緣。常恐相見稀，白髮盈華巔。饑驅各無
奈，嘉會良獨艱。我有直諒友，指盧一枕言從髀。湖旋向余道，
顛末並世無。君賢性定若止水，筆落如奔泉。安貧戒躁
妄，好客忘迍邐。古處式彝訓，末學蒙陶甄。清夢寄瘦鶴，
安肯誇腰纏。甘旨承慈親，孺慕心歡然。聞名亦已久，望
眼更欲穿。襤被惠然至，開徑相招延。乍見心先喜，坐久

神獨閑兩情此愉悅舉止非拘牽詩盟訂久要雒誦秋水篇

和王洵遣懷韻

妻累周融肉累何況經憂患更蹉跎年華浪逐長江水
世路風生古井波話到故交情太重事逢得意悔偏多
幾回根觸無聊感佳日還應病折磨

萬頃芙蓉瑟瑟愁滄江有夢寄寒鷗客來襲草門難杜
老去簪花鏡亦羞幻境已隨蝴蝶化荒臺不見鳳凰游
敢將月旦評儕輩誰是人間第一流

蒼茫天地苦吟身知己無多氣味親浮世聲名羞鼠璞

磨人歲月試龍賓劇憐孟浩詩成識每笑楊雄賦逐貧
甘向蓬門壓金線底須惆悵浣紗津

子履師饋米賦謝

天寒有客倚修竹雪花如掌打人屋
囊中糧盡鼠亦饑八口嗷嗷歲事蹙
歸謀諸婦婦曰嘻粗糲難充况旨蓄
作書乞米增羞顏無計加餐但枵腹
忽聞扣戶聲誼詎疑是催租苦追逐
那知清俸分廉泉頓覺陽春到黍谷
降拜登受中心慚如愔農夫登嘉穀
舂揄簸蹂釋復烝妻孥私向厨下祝
祝詞喃喃聲不聞惟乞長者膺苜蓿
飯香撲鼻思開樽一笑梅花酒釀熟

除夕

此夕又除夕今吾仍故吾年來同夢醒臘盡尙飢驅興
趣消薪米功名讓釣屠祭詩還失笑能值一錢無

餞春詞

桃帶朝霞柳帶煙輕風翦翦雨綿綿惱他燕子無情緒
猶蹴飛花落舞筵

三尺青青蒲葉長四圍密密菜花黃東風不管人離恨
滿地榆錢促辦裝

枝頭小鳥喚提壺一笑黃金買得無獨有王孫太無奈
天涯芳草滿平蕪

無計酬春酒一杯送春歸去望春來明年二月春如海
寄語長安花早開

堞影軒詩稿卷之二終

堞影軒存稿卷之三

山陽李續香少白著 鴛湖王 相惜庵輯

雨泊真州

豈有驚人句青天喪手看潮聲催雨急水氣近江寒遠
樹碧如洗野花紅欲攤前途好山色詩興莫闌珊

曉發揚州

四圍城郭繞秋柳有餘青雨過疑潮溼風多雜水腥囊
空關吏笑帆飽榜人聽此去江湖濶蘋花散晚馨

東坡生日偕萬鏞蕭光裕葉紉蘭小集盛子履師
澹然居分賦得盤字

歲暮得良聚交情敦古歡話舊共傾盞說詩新築壇
眉山不復作精氣時鬱盤手持一尊酒薦羞申茝蘭座中
素心人文譙誇團欒或爲諸侯客或作冷署官時宜不
能合榮利無所干賤子骨亦傲隱憂集百端身世太偃
仄俯仰聊自寬修名况未立感此中腸酸平生重師友
往往傾心肝俗物豈能敗嘉會良獨難辦香奉坡老砥
柱迴狂瀾烏臺半傳會論說非不刊鶴飛將千載放眼
青天看慨然發遐想繞屋梅花寒

寄陳西堂卽題其近作

挑燈把卷細商量對此何知夜漏長兩地春風勞問訊

一天涼月立蒼茫休將廋語爭秦客

西堂好爲隱語故云

且自行

吟學楚狂他日懷人新得句詩成先寄水雲鄉

感逝詩

上元孫秀才

嘉言

世人爭浮華君獨尙脫畧世人較錙銖君獨好揮霍手
散十萬金生計日蕭索而其性天中陶然有真樂我來
石頭城游仙屐共著兀立山之巔君言健腰腳鸞鳳時
一鳴浩浩散鴉雀終年居醉鄉客去主獨酌止酒未一
年二豎夢成噩宿草封墓門重過淚雙落

雲夢許中丞

兆椿

先子昔司訓公時爲方伯因事以力爭利害細抉摘盛
怒豁然解顏色爲之懌從此訂相知問訊無扞格先子
歸道山公來建檠戟先子卒於戊辰春公於是年奉
命督漕運事問及先子愴然久之
廬念故人子督課示繩尺倏忽四五年公亦安窻多思
公已潛然古道記疇昔况復讀父書傷心痛手澤

太倉盛秀才

徵璣

君年三十耳中道忽斷絕平生才不羈出言若電掣閨
中有良友一旦成死別心疾遂弗瘳薰灼作內熱以此
戕其生聞者尙嗚咽見怪見溼灰嗒然誓同穴余懷更
悽楚河干竟永訣試讀嘯雨編字字淚與血

秀水錢秀才

塚

雄心輕萬夫氣足神益王而其習靜時淵然宏度量公
卿文史間脫畧而跌宕騷壇執牛耳心兵鬪不讓洒然
出塵表古誼正趨向去年聞君耗方謂人實廷那知三
載前牛眠已卜葬生芻未奠祭故人或我諒

錢唐馮明經

入蘭

記逢丈人年七十已踰五先我年五十邀我訂蘭譜竟
作忘年交胸中無城府發聲如洪鐘議論孰敢侮讀書
得精義眉色欲飛舞琴操寓意深語語出肺腑

見贈琴歌二章

音節伉爽

情致纏綿長眠邱貉中典型已千古

湘潭周侍郎 系英

夫子性高潔常懷憂患汨賤子性迂拙坐受文字累謬
蒙青眼青提挈聲華易其如賦命薄少進輒顛墜本是
驚駘材安能比騏驥索我囊中詩繕寫入行笥斧斯未
及終公竟與世棄知己無幾人愴然感高誼

萬載辛侍郎 從益

巖穀天下聞正直舉朝懾平生勵廉隅士氣盡聳懼荷
公相知深齊許升堂攝指畫到微茫玉色藹然接示我
三百言大小字重疊退而銘諸心不敢復漁獵賤子辱
公教從游將負笈公又騎鯨歸空庭下木葉悲哉木葉

聲聞之淚滿睫

同里邱上舍

炳

夫君才不羈明敏具夙慧蛾眉謠詠來誰與階之厲竹
爐茶竈間孱軀伴藥劑而其豪氣生手作飛觥勢客來
時藏鉤卜夜晷屢繼病劇不辭勞魂魄溘然逝我思意
中園臨風每雪涕

君字月樓曾作意中園圖其屋
後有隙地將按圖造園卒不果

苦旱

陽氣亢無極炎歊肆暑威日乾烘雨散風怒挾沙飛大
野鳥無啄荒田蝗獨肥願言告司牧何以慰民飢

寄太倉黃秀才

鐔

平生文字交相視豈隔膜一別乃五旬聞跨揚州鶴夫
君性高潔世事浮雲薄兩衷生清風歸來不飽橐離鄉
千餘里譬若風飄箴我亦辭家人荆榛困束縛嗟嗟我
與君中年共落魄辭君時相逢偶語得真樂行色何匆
匆蹤跡竟落落安得長合并促膝坐草閣清茗爲我斟
醇醪與君酌澄心謝流水後會申前約作書懷故人臨
風感離索

悲歌爲薛生

師沆作

薛生來薛生來七年不相見見爾不覺心肝摧我歌爾
莫哀而我轉欲爲爾哀

一解

爾之聲音猶疇昔爾之笑

無愉色爾之貌胡爲憔悴而骨立爾之貌令我酸鼻

解

爾從我游樸誠罕與生同儔識解罕與生同儔樂我

之樂憂我憂我與爾性情兩相投

三解

爾運坎壈百無

一可動輒得咎事相左世人大笑爾與我

四解

一歌再

歌涕泗滂沱長歌短歌悲來如何古來大器晚成者多
如生斷不長蹉跎哀生惜生爲生歌生其勉旃歌我歌

正月十六日卽事

雪花如掌大正是出門時雲氣連城暗風聲繞屋馳長
懷貧女歎甘受老兵嗤不識傭書者侯封可有期

感事示諸同學

靈鯤游北溟不與魚鰕侶有時化爲鵬萬里任高舉得失憑一夫識解易齟齬此事微乎微心定色莫沮可笑宋人愚三年刻玉楮大匠無棄材所得盡翹楚

讀書求科名已非聖賢學舉世爲文章強半尙雕琢荆玉本足珍別之以其璞瘡痂有何味嗜之乃同鰕生徒具英姿明敏兼純慤譬如涇與渭能辨清與濁學古獲令名德修乃罔覺

泰州徐君

鏞

爲余作拈髭圖詩以謝之兼志感也

我亦尋常行路人君能貌我便精神當場未必鬚眉古攬鏡誰憐骨相貧浪說拈髭吟白屋翻愁插腳近紅塵

圖作半身攜歸博得妻孥問面目何須如此真

喜晤陸妹夫從星卽以贈別

僧寺一宵話

時與篆香樓詩僧淵如新訂交卽主於其寺

無聊月滿庭八年

來舊雨

指陸棣堂丈

千里感晨星

通州成盞蓀兄去年八月初下世

友誼膠

投漆生涯絮化萍不堪談往事書劒竟飄零

記得偕居樂聯吟到夜分相思付流水無計駐行雲河

北應思我淮南獨憶君合并原有日何處共論文

忽報征衫脫相看願不違招尋十五里剝啄一雙扉豪

氣頽然放新詩著欲飛

時讀君近作十數首

如何纔把袂揮手又

言歸

歸去亦佳事臨岐合贈言余懷同軸轉人事任瀾翻習
靜航青簡重游約白門來年好秋月江上滿開樽

懷同里諸子

天意釀秋色客心思古歡愁來如有約別後轉無端柳
葉翻風勁蘆花劃水寒年年原見慣消遣此情難
東下淮流曲移家澗水濱每懷朋輩切難得笑言親地
主惟明月天涯有美人相思渺無極况復是蕭晨

漫成

西風吹慣鬢邊絲又是涼天散步時肺病經秋常破睡
心情耐冷只尋詩無多弟妹疏音問

余女弟二一適數
十里外一適三百

里外與芷江弟相
隔亦幾五十里
大好朋交半別離
我有愁懷消不得
便教知己未全知

和盛子履師述懷

年來百事讓人先
賸得襟懷尙灑然
有價始知文字賤
無成轉恐姓名傳
誰誇威鳳鳴朝日
我似寒蟬咽冷煙
短髮飄蕭吹又亂
星星早已近華顛

本無福命列仙班
居處惟思竹石環
疏懶性宜隨地隱
癯寒詩或破天慳
煙雲過眼都成水
塊壘填胸欲化山
自笑空囊太羞澀
不因中酒亦酡顏

心似叢麻與亂蓬
昔時結客悔匆匆
消磨人事窮愁裏

感慨交情閱歷中德本非孤偏不偶手真能妙自然空
雲翻雨覆尋常耳莫愛新紅洗舊紅

事業飄零冀奮興先人庭訓憶親承浮言莫信神仙術

直道羞爲妾婦稱

先子守道甚篤嘗戒香勿惑於浮屠道士說又嘗云光明正大豈可同妾

婦哉若作父兄培子弟好將矩矱守高曾遺言在耳音容
渺淚下沾裳奉豆登

休將騏驥比今吾局促終爲轅下駒問舍求田真瑣屑
厝薪乞米竟羈孤算來好夢成虛夢歷慣岐途當坦途
不向嚴君平問卜浮生何必計榮枯

予季飄搖大半同雄心付與酒杯中重城疊嶂孤懷寄

帶水灣環別路通如此家園偏作客那堪衰病易成翁
傍人笑說難兄弟一樣謀生計不工

秋來涼月十分清畢竟天公不世情短短豆花初落實
疏疏菜甲又勾萌眼前俗物原難敗心上牢愁總易成
多少知交半零落更從何處話平生

渺渺天涯尺素書迢迢雙鯉隔年餘近時然諾輕相許
舊日朋交漸已疏兩地懷人勞燕雁半生廢學困蟲魚
等身著作吾何敢幾輩飛騰到石渠

每因幽恨涉遐思嚼雪含冰只自知絕調誰傳中散曲
殘編且讀少陵詩若工詞賦還哀怨莫嘆艱難未化離

卻笑昵人小兒女商量新穀問新絲

巢棲誰識卧雲身想到空山太古春但用機心謀亦拙
便翻花樣色難新少年本未工塗抹賤子安能免苦辛
收拾琴書付猿鶴平情且閱眼中人

吾道師門一力任他年作傳合儒林性情真自生孤憤
經濟窮惟仗苦吟常憶舊游同覆鹿偶披古帖傲來禽
胸中邱壑皆圖畫擬向雲山深處尋

俗狀難除俗累侵忽聞雅調發惜惜書來止酒情何厚
說到歸田慮更深風雨相思招下榻海天無際聽彈琴
原知此曲高難和感喟聊伸一寸心

喜舍弟至

蕭蕭風雨泊河干，天遣濃陰釀薄寒。
小艇載將家具去，荒村收作畫圖看。
旁人漫說移居好，有客同歌行路難。
不信空囊少顏色，就中書卷尙叢殘。

爾我都將豪氣銷，謀生作計總無聊。
嬾看天上雲千疊，贏得門前水一條。
乍見不堪談舊事，頻年最樂是今宵。
無情恰恨春風惡，又送輕帆過板橋。

枸杞井

在開元寺內

風淘古井已千年，芳樹垂垂繞檻圓。
今日我來橋上望，絕無仙犬吠寒煙。

萬柳池邊放櫂回
開元寺裏看花來
欲尋夢得題詩處
古木寒泉長碧苔

題薛秀才 超曾 留刪草

男兒墮地一聲哭
百年憂患纏其身
稍解識字便坎壈
况復有才無等倫
薛夫子家澗北住
我亦移家南澗濱
相見不覺爲傾倒
脩然瘦鶴生精神
有時溫語藹以吉
花濃風軟揚和春
忽爲雋語冷而峭
霜凝冰結當蕭晨
發其胸中骯髒氣
奴視眼前襤褸人
人言狂生不可近
我愛奇論時相親
靡靡者草易于腐
錚錚之鐵良足珍
魚更書屋羅萬有
筆床墨匣無纖塵
苦吟獨具松柏性

逸志乃與泉石鄰一編著述九脫手十復雒誦沫流唇
落筆不肯籬下寄我用我法詩境真興不可遏樂莫樂
情之所鍾醇乎醇一言報君君定笑詩骨不鍊安敢貧
貧交與君申信誓白水不寒青山新

題棧道圖寄示陳二

長庚

人言蜀道難峩峩劍閣凌雲端我言蜀道易坦坦夷途
若平地蜀道難易何不同近來人巧欺天工况復人情
不可測腳插紅塵總偏仄長蛇盤曲猛虎蹲吮血磨牙
何足論世路崎嶇皆若此吾家太白寓言耳易視蜀道
非人情蜀道尙比人心平魚鳧蠶叢自高下古來多少

遠行者紛紛蠻觸空怒噴披圖試看騎驢人

寒夜獨坐痛二兄七弟相繼下世愴然有作

難隨太上學忘情百樣牢愁一霎生鳴雁嗷嗷誰作主
荒雞喔喔不成聲飄零家室還貧病渺杳泉臺有弟兄
熱血滿腔何處灑且揩淚眼對寒檠

揚州謝堃索詩作此酬之

記乍相逢薄暮天韓侯祠畔草芊綿客來重訪題襟處
小別于今又五年

我爲飢驅到澗東頻年蹤跡悵飄蓬同懷人去詩情減
先生重到淮郡時愁對秋雲訪寓公
香有弟喪未走謁

春草池塘好夢新

先生集名
春草堂

笑攜書劍走風塵清詞唱

出黃河遠

先生傳
奇名

壁畫旗亭有替人

春鳥秋蟲祇自鳴忽傳芳訊問平生一編商推勞知己
只恐難參大雅聲

十二月十四日賤辰哭亡弟

友香

卽題陳二

長庚

蘭因絮果冊子

今日何日慘不樂仰天痛哭氣蕭索有弟後我十年生

七尺長軀委溝壑一百七十五日中

弟歿於六
月十九日

手臂失

措足無著獨行獨坐我心孤暮暮朝朝雙淚落嗚呼今
日是何日耳聞祝詞心焦灼前年今日我四十弟來向

我就杯酌弟言我輩宜盡歡豈有神龍受繭縛去年今

日弟書來書來告我甘藜藿望我重題人日詩囑我早

踐草堂約今年二月移家東板橋詩識春風惡

余有無情最恨

春風惡又送輕帆過板橋之句

水鄉地僻聞無人偏仄樊籠困瘦鶴桃

花紅入三月時襍被攜來宿草閣是時座上八九人放

膽呼杯恣歡謔

時白泉石泉諸相知皆集予寓齋中

一朝散失如飛煙天

涯各插紅塵腳五月書來談秣陵青山早晚入簾幕最

高峯頂莫愁湖神往心搖意踴躍

皆書中意

暑氣蒸溼不可

當天心何苦逼孱弱忽傳死信來荒齋如墮層冰蹈鼎

鑊呂君與我兄弟交凶耗同聞驚且愕急行夜走發長

號慘絕千呼不一諾

是日百川與余同舟自城中歸途間聞耗遂不赴館與余星夜至太

倉視亡弟入斂

斂不成禮我心慙書生到死命還薄死後驚傳

大水來又恐波臣肆凌虐一棺移置梵殿旁吟魂旅魄

同飄泊寡妻孤兒熒熒哀非後死責將奚託老兄不智

妄爭名歸來仍掃秋風籜十月終爲窀穸謀

葬期十月二十五日

弟有知兮安邱貉今日念此摧心肝况復良朋不落莫

西堂今之古君子七十里中奮芒屨夜與高君徒步行

謂警夫

憑棺一慟淚欲涸還將遺跡付潢池賸墨零箋尺

寸刺一杯在手人不見使我精氣日銷鑠嗚呼此是千

秋萬古恨豈獨今日之日慘不樂

我有

我有太阿劒千金不肯賣奇鋒懾蛟鼉光刃射靈怪持
贈烈士歡起舞中情快卓哉延陵子能爲徐君挂古道
不可尋撫劒發長喟

我有藍田玉可以作圭璋琢磨旣成器韞匱深自藏豈
無特達時安能秘奇光砥礪日以貴瑾瑜價不昂對此
席上珍銜玉終非良

我有紫瓊琴脩桐勝香檀有時一再鼓茫茫江月寒此
曲動人聽訴我平生歡不憂和者希但傷知音難世無
廣陵散抱琴何必彈

我有大秦珠的爍罕與比夜夜生光明有如月在水魚
目不敢混驪頰探有以耳後雙雙懸美人顏色喜所遺
非美人投珠深可恥

我有青銅鏡出匣光熒熒蟠螭勢欲飛浮雲不暫停覆
以錦繡匣置之翡翠屏心膽能照徹卜兆亦通靈獨惜
鬢毛衰攬鏡羞鑒形

卽事感懷

旅館太岑寂寒燈耐苦吟雲山迷好夢風雨老秋心詞
客閒情冷美人幽怨深余懷感搖落况復聽清砧
晨光纔入戶擁被不成眠心事寄遙夜腰圍減去年連

宵茆屋雨三月藥爐煙健婦今多病

內子素無疾自六月感時疫至今未

愈
參苓手自煎

故人客京洛

謂盛稱蘭

豪氣帶幽并兩載忽相見一樽無限

情撫時驚老大懷舊益淒清對坐默無語

時方落解

蕭蕭落

葉聲

鏡中羞自照白髮上頭多故我猶如此生涯竟若何登樓空嘯傲躓堙悔蹉跎獨有貧交久能知勞者歌

悼內

疾雨淒風痛莫禁寒燈無燄冷相侵半生貧賤原能諒隔世音容不可尋已過流光成轉瞬備嘗苦境總傷心

漫言此恨人人有兒女伶仃我更深

病中促我束行裝話到江南亦渺茫山水無情空往返
夢魂相見益淒涼家常好語都成讖客館悲懷忍暫忘
此日回思更嗚咽總惟癡立淚千行

生計艱難事事違昔時歡笑已全非饔飧籌畫空倉米
寒暑商量質庫衣手任裁縫窮目力心勞井臼減腰圍
外家門戶凋零甚流涕常談骨肉稀

沈疴猶自強支持慘絕臨岐送別時幻事孤吟飛鏡破
遺言深悔到家遲最憐去日非來日那識歸期卽死期
營奠營齋何所益夜臺消息有誰知

告哀

舉帷夜不寐愁見明月光柝聲繞屋來驚起披衣裳臘
氣侵病骨車輪轉迴腸中年多變故幽憂不能忘罡風
太無情吹散鴻雁行兩翼戢其右何時同頡頏閨中有
良友蕉萃勝姬姜悲哉賦命薄泉路隔茫茫長女婉順
姿性柔而志剛明珠忽毀折厄閨如黃楊月輪十八周
咄咄遭三喪人生非木石於邑中心傷縱有齊物論安
能學蒙莊

天心豈太酷我生乃不辰怪譎日者言辰遇戌則屯涉
世在庚戌辰阨非無因丙辰余七齡牀蓐時吟呻譬言

幾死數累我堂上親戊辰年十九花廳萎蠹椿慈母庚
辰歿失恃多苦辛往事驚心魄流光逐飛塵年來與客
語念此氣不伸日者半荒誕於我何獨真執徐吾仇讐
元默亦非人九閻不可叩白晝飛陰燐作詩以告哀淚
下沾衣巾

哭適朱長女

佩鸞

悼內詩成涕泗漣那堪老淚又潸然前身想是騶鸞者
小謫人間廿七年

女未生時內人告余夢一女子
乘青鸞自天而下故取以名之

十日相依不欲行扁舟歸去淚縱橫催歸不是無情者
夜半猶聞喚女聲

草草光陰又九旬阿孃病已十分真牀前賴爾嘗湯藥

好語還誇不死身

內子病篤猶謂女日爾非早死者

新辭夏屋駐蓬門五日都無一怨言慘絕呼耶兒永訣
今生何日報耶恩

藁藁禁鼓正三敲一縷魂飛萬事拋我在夢中渾不覺
藥方爲爾手親鈔

急謀窀穸不能留三尺荒墳土一邱畢竟夜臺在何處
可曾尋得阿孃不

我已無妻婿亦鰥鼓盆聲繼七旬間

內子卒於閏月望日女後六十七日

死

滿腔幽憤從頭訴紙上分明血淚斑

與陳守府忠夜話作東洋行

飲君之酒鬱金香請君爲我說東洋我聞海水如壁立
軸轡搖蕩隨風颺萬山綿亘何處泊請君爲我言其詳
君言無風浪亦大浪花直使船掀揚側身隅坐坐轉正
不然人與人低昂席雲初起一點黑颼風震動敲危檣
是時舟師不得力不知吹送何山旁中有亡命聚族處
結廬乃在山之岡孤舟估客魂未定小舟環集圍中央
舟中百貨任剽掠紛紛舢筏同探囊忍死吞聲不敢說
腰間刀劍明輕霜去年隆冬氣栗烈元戎飛檄嚴巡防
百二十人勇力鷲精兵八十鳴金鏜放船直下搗巢穴

奸人喪魄走且僵登山周視無人蹤食貨充積室中藏
編茆爲屋屋甚密巨竹作柱籬作牆大呼回祿火烈舉
煙青燄黑山焦黃馬脊山民導前路山後兩洞竊以長
洞口蛇行始得入其下漸大昏無光執燭俯視人十數
一一曳出加銀鐙伐鼓回舟餉壯士招徠行客收餘裝
我聞此語神氣暢水師令肅清海疆海疆安輯海波濶
書生眼界凌青蒼安得與君共舟楫約君長嘯慨以慷
乘風破浪亦常事笑看紅日升搏桑

從陸女弟十年不見矣客從北來裏書相示極道

相憶之苦作此寄意兼柬陸妹倩

從星

七載同居重薦蘿十年離別隔關河客來常話鄉情切
夢去其如遠道何笑我無家貧已慣因人成事悔偏多
可知骨肉摧殘甚重見應驚鬢髮皤

客中兩度誤行期草草勞人覲面遲別久將逢情更急
書成未到意先馳私衷款曲通前約良會殷勤報故知
一紙郵筒君記取榴花開日我來時

歲月如流故交易逝明師益友宿草荒煙悵觸於
懷曷能已已得數截句用代挽歌

成秀才

儔

海上翩然一舸回歸家人竟不重來詩囊畫稿都零落

太息江南少逸才

萬司馬 承紀

雄辨鋒能敵湛盧
官聲廉敏靖萑苻
平生心血銷金石
墨濬曾分斂塵圖

劉秀才 朝綱

婦人醇酒豈全差
謠詠蛾眉近狎邪
塊壘滿胸填不得
傷心到死竟無家

張舍人師 廷誥

宰官依舊是儒官
六載賢勞力已殫
回首師門風義重
一編相對淚闌干

郭明經磨

人間詞賦庾蘭成
天上神仙石曼卿
屬纊尙完文字債
道山歸去最分明

江秀才青

晉唐楷法擅風流
詩被催成氣益遒
腸斷錢唐江上路
魂歸猶憶故園不

汪員外敬

君來訪我暮春天
我去尋君上水船
一誤已成千古恨
只餘荒冢弔寒煙

題王炯飛泉漱玉圖用東坡龍尾硯歌韻

抗塵走俗大可惜誰識山輝孕靈璧古來畸士襟懷寬
寄情往往愛泉石王生興酣搖筆時每聞俗客揮手辭
世上榮利了不顧胸中邱壑惟自知一道飛泉滌浮垢
清氣從來未易有生獨得之完其天景昇兒子墜乎後
榮兒與甘北山作雨南山雲此間幽絕無纖塵高吟默
坐皆自得不妨奴視眼中人少年出處審所擇精境語
生不可畫要知清濁只因心在山出山亦何別

和邵二感懷二首

孱軀困暑溼倦極難蚤起披衣讀新詩痼疾霍然止亮
哉見道言區區永自矢去日不可留駒隙急于駛覽鏡

鬢毛蒼輅伏在鄉里無聞不足畏吾衰已甚矣少壯酣嬉戲飽落竟如此修名未能立浮譽良可恥

寶劒藏匣中舞爲雞鳴起問我何所爲孳孳不肯止男兒志四方墮地重弧矢寸陰所甚惜生恐颿輪駛鳳皇翔九似騏驎走千里人爲萬物靈雄心難已矣抗懷霄漢上榮利豈戀此我思投筆人能雪傭書恥

增景軒存稿卷之三終

堞影軒存稿卷之四

山陽李續香少白著 鴛湖王 相惜庵輯

獨坐

獨坐氣蕭瑟寒蛩不斷吟
中年消壯志涼夜碎秋心
似海新愁湧如雲好夢沈
孤懷何所著那忍聽清砧

雨夜雜感

秋風吹古木迸作一天聲
蕭殺氣方盛蕭條人自驚
漏痕添老屋涼意入寒檠
對此感搖落孤懷鬱不平
神氣太蕭索無端病屢侵
鴈聲驚短夢蛩語咽秋心
獨我飄零慣依人感慨深
龍鍾雙叟淚愁聽雨沈沈

卽事呈潘三

德興

與君幾日不相見屋角梅花已盛開
畫意詩情都冷落
天時人事費疑猜
奇寒亂下三更雪
驟暖驚聞十月雷
粒米似金薪似桂
那堪重舉手中杯

邵生

茂棠

自揚州回罄談陳蹟半作邱墟回首舊

游棖觸難忍走筆成六絕句示之

竹西歌吹豔揚州
簫管聲濃不解愁
聞說風亭與月榭
一齊都付乞兒游

亂石斜敲瑇瑁梁
玻璃窗戶日無光
零軀斷瓦歸何處
蔓草秋風牧馬場

浮玉山從對面來觀音樓閣極崔嵬而今不見江心塔
望遠人驚劫火灰

康山樹樹好梅花曾駐紅樓油壁車此日自開還自落
香風只到玉鉤斜

一棹扁舟接遠村嚴風尖雪易黃昏憑誰繪出蕪城景
落日荒荒水抱門

平山堂與小金山記得兒時數往還畫舫酒旗零落盡
不堪腸斷卅年間

與蔡天祐話舊

我生慣歷崎嶇路百折千磨氣更增不合時宜人共笑

步騎車不和 卷之四 二
獨彈古調爾偏能文章師友聯三世風雨吟哦聚一燈
話到鳳池好消息笑開老眼看飛騰

王惜庵集曇香精舍分韻賦詩者凡九人余不得
與作五古九章遙和之

鍵戶日返觀斂氣求靜理苦無糞心功偶縱心卽弛良
友訊所習惠然賁一紙厚期無薄償猛省發深恥何當
重聚首釋我吝與鄙繙書再四閱遐想曷能已

三載一相見故交若新歡我行迫歸期別君河之干裘
葛變寒暑楮墨伸平安書來招我往恨無晨風翰欲往
不自由出門良獨難

宵知不成寐夜雨滴空階披衣聽漏聲離緒攪中懷曙
色忽晴霽黃鳥鳴喈喈兀坐對鉛槧勸極誰與偕散步
望平疇老眼臨風揩差可悅心神遠樹雲邊排所思獨
不見咫尺成天涯

書來告勝游清風時遠播三日墨香居吟嘯雜倡和清
言脫塵鞅妙解近蓮座石徑生蒼苔屐齒不嫌破賤子
負良約搦筆氣先挫况復膺煩囑一字不能作挑燈急
報書聊以志吾過

春風扇太和萬彙日茂鬯園中桃李花生氣足醞釀雙
燕上下翔呢喃語相向來往銜芹泥故巢幸無恙人生

宇宙間心期霄漢上君聽勞者歌諒我塵俗狀緬懷達
士心雅抱觀所尙

薦蘿鬱青葱托體松柏根少小雨同心藹若弟與昆陸
子何淵默出口無近言古稱狷者徒亮哉道心存與君
相琢磨義理最朝昏兩家宅相成我思魏陽元奉書陳
懷惻惻言要義不煩北望縈舊想慨然懷德門

故人疑晨星落落幾人在葆此百年歡後起將有待哲
嗣名父子樸實含文采與君聯襟游忽忽三十載恩誼
久益堅每見傾真宰人生重金石臭味比蘭茝浮雲去
若馳山色青不改

娟娟木芙蓉一雨當階放名花如高人顧盼矜骨相對
茲豁襟懷詩境彌跌踢良辰發浩歌聞之神氣王春歸
人亦行綠波泛新漲歸帆一何速悔不扁舟訪

壇坫開尊罍草堂賓主美中有嶽崎人邂逅我心喜鄭
君氣沖雅新聲追正始錢生才磊落奧義通經史一語
愜素心著論輕餘子夙昔夢見之顧我衰老矣而與佳
士游如病霍然起曲沼荷風香嘉會欣孔邇

歸舟病中作呈郝二

其轉

郝三

其輅

潘大

亮弼

又返秦淮櫂青山繫別情天風雙袂舉雲水一江明往
返人千里蒼茫夜五更推篷望秋月心與大潮平

暑氣太騰沸，屏軀病易侵。死生孤客淚，患難故人心。
薄俗文章重，吾儕道義深。連宵飛夢渡前路，喜鄉音。

移家

泛宅浮家水一灣，長橋紅板繞柴關。閒情未解心偏靜，
病體雖充氣尙孱。上客酒樽空北海，中年絲竹感東山。
故園幸有貧交在，鎮日清談數往還。

喜晤陳二

長庚

塵俗久相溷，開顏忽見君。別情感流水，好夢寄停雲。
何日來三徑，聯吟張一軍。行行不忍去，小立對斜曛。
糝地有餘雪，嚴寒共踏冰。性情總孤冷，身世倍凌兢。舉

首羨飛鳥攢眉笑凍蠅梅花香已透好與訪詩僧

觀寶生

元渾

家藏東坡與可風竹兩大幅作

世人畫竹皆草草得其妙者世絕少枝長節短真趣無
貌合神離氣色稿寶生示我風竹圖一筆能將一丈掃
一題文同名一乃東坡造澄心堂紙宋代珍七百餘年
尙完好初看墨藩太狼籍淋漓沾濡似桮棬細看波折
何分明清泉韻戛幽林繞想見興酣搖筆時天風浩浩
起蓬島就中題者數十家或縱或橫或幽杳我讀元章
讚語諸情重意傾倒我讀蘇子記年月之日確可考兩
圖各具神妙姿誰其得之孫莘老留傳神物直至今商

邱中丞采麗藻

國初諸老詩句多風雅上與古人紹對此拂拂生清風
更覺此君出塵表枯腸得酒芒角生逢人自誇眼福飽
寶生寶生什襲藏子子孫孫永爲寶

感事四律寄示二姪

啟山

塊壘胸中滿非徒七不堪人情工巧取世味已深諳不
信違心事偏勞促膝談行藏吾太拙繭縛似春蠶

出門戒行李不及勸加餐豈作迷人計翻同避債看余
懷原坦率吾道竟艱難著屐登舟去蕭蕭暮雨寒

且傍舟人宿無煩醉尉呵逆風生白晝曉日渡黃河稍

覺襟懷濶其如感慨多中流頻擊楫故態發狂歌
迢遙四百里遠道自今年入室琴書潔當門花木妍拂
衣游客倦投轄主人賢寄語汝兄弟平安信可傳

偶成

拋書倦極不成眠無限鄉情到客邊料得家園小兒女
此時團坐夜燈前

阿咸家有園林好每爲尋芳日往來欲向春風問消息
杏花時節可曾開

陳生視我如兄弟春草初生又一方我有惠連隔泉壤
教人那不憶西堂

風瀟雨晦記前宵賸有吟情破寂寥多事小僮含笑說
再過十日是花朝

懷潘三

德輿都中

論交三十年比廬五六載忠告陳良規披胸見真宰讀
書植本根其次乃文采守己端性情所重寡尤悔友君
兼師君古道今尙在書紳謹識之佩服罔敢怠

客秋鬱暑溼微軀邁瘡瘍藥餌一不中貼危羅奇殃君
來視我疾顏色時倉黃直視默無語欲語淚盈眶市醫
從外來君言慎勿傷昕夕三四至爲我謀久長沈疴霍
然起拍手笑欲狂真體內未充戒我毋伐戕感此鄭重

意思君心傍徨

束裝歸里門執手澗水畔解纜不忍別慨然感聚散知
我將遠行贈言何繾綣君旣游上都我又在他縣流光
去如馳飄忽春已半春風動客心故人久不見長安花
如雲走馬一日看文章發經濟聲華振詞翰豈爲榮利
爭相期德業建臨風想光儀區區抱私願

寄家書作示兒子

樹榮

書去心隨去余懷爲爾縈加餐培弱質力學謝浮名弟
妹憐嬌小知交近老成斯言常記取或可振家聲

題王炯

炯詩卷

我聞千秋業所爭在不朽出言一不慎世卽議其後君
今鼎盛年立志堅且久詞章雖小技吐屬亦非偶侍養
承歡心推誼重朋友匪徒趨向端良由性情厚奇巧力
能絕浮華安所誘人方涉藩籬君已窺戶牖展卷再四
閱欲廢不釋手一言敢相勗堂奧辨樞紐相期山岳高
俯視皆培塿相期淵海深容納皆澤藪笑我日衰老頽
退漸成叟譽君非諛詞進君有苦口知君勤學人我言
心許否

里居無聊感懷兼憶閨秀才

玉龍

暨及門諸子

到家稚子喜阿耶今歸來門前小桃花一樹紅雲開坐

定語世故人情生嫌猜
蚍蜉恃微力撼樹良可哀
螳螂奮前臂當車徒自摧
吾自守吾素一笑掃浮埃

卜日戒行李客子將就道
擬於初十日北行不果
店癯頓相還敲

枕空懊惱顏色既慘淡
面目復枯槁生年未半百
多病易衰老緬懷素心人
別況心如擣良覲竟愆期
神魂已傾倒安得晨風翼
奮飛相見早

數子共晨昏藹然居一室
和氣揚春暉盎然書味溢
木雞有涵養威鳳何超逸
顧之怡然樂高明寓篤實
別來匝月餘相憶無虛日
望望長河流足違心彌急

舟行無事憶泰州徐秀才
駒
卽用其寄陳二
長庚

韻

傷心絮果與蘭因生死交情近古人

亡弟遺詩陳君裝成卷徐君作記程

先生題爲蘭因絮果

宿草荒涼迷大夢好花零落送殘

春鷺肩異相空呼酒雞肋微名枉卧薪

亡弟性嗜酒歿前下帷攻苦勝

于平

獨向池塘頻太息絕無佳句負良辰

星星白髮忽盈頭入耳浮言總謬悠浪說高山成土壤

虛傳平地起岑樓綈袍有客誇秦相刀筆何人薄鄼侯

一笑千秋有定論每因讀史看吳鉤

祝融回祿屢爲災謠出聲從何處來半夜人驚紅日出

終朝天遣火雲開

清淮邇日火災盛行幾數千戶漕艘被火亦數十計

危居大有

焚巢懼上客非無轉漕才多事書生偏下淚焦頭爛額
不勝哀

同是天涯作客心相思兩地擁孤衾別來况味酸寒甚
話到貧交感慨深韞匱敢誇無價寶躍爐悔作不祥金
故人三載音書絕風雨懷君酒懶斟

邳之東隅飛蝗長集天久不雨雨亦不潤作望雨

消蝗行

黑雲翻墨天邊堆電鞭怒掣雷車催老農仰天拍手笑
一雨三日消蝗災颶輪忽送屏騎至阿香頓回豐隆轡
雲將躍然趨北行雨師倏爾向東避蜥蜴滿山禱不靈

龍神戀蟄眠不醒蜂屯蟻聚地盡赤蠹耗蠶食田無青
我耐風伯一樽酒動之潤之各有守况復蟲孽傷禾苗
土乾日燥旱熯久其雨其雨暮復朝何爲耳畔常刁調
飛蝗焚瘞不能盡雨零土漬形乃銷氣舒得伸大塊噫
山澤氣通亦良快沛霖能助蟲能除披襟當之甘下拜
祝詞甫畢吼聲平回車轉馭西北迎畢竟天心溥仁愛
東南又見雲頭生

僕以病歸十日矣尙無消息感而作此

我聞穎士奴子知愛才揮之不去咎復來又聞溫公之
僕性尙質不稱相公呼君實我無才德偏疎慵累爾遠

道來相從我無僅約罵不謾朝爲我炊夕執爨崔塗詩
句能動人骨肉漸遠僮僕親米鹽煩碎日多少爾獨經
紀不我擾憶我來時時在牀我病爾爲我蒼黃小極十
日霍然起爾亦雀躍色然喜驅車復向西北行搖鞭又
聽鈴蹕聲下車入門氣勃勃猶向同儕詡捷足胡爲面
目忽然顰神氣沮喪頭常垂彼何人斯微且蘊似溼似
風血上壅爾前致詞思暫歸思歸不歸情亦非計爾歸
期已十日望爾書來我心疾豈獨念爾今何如爾歸爲
我催家書

陸妹夫

從星

以卻暑見懷二十韻相示依韻和之

少年自詒戚壯歲夫何尤所以非笑來芥蒂心不留君
靜我則躁事異情實侔從來一念錯卽罹千歲憂閉戶
謝塵軌緘書戒朋儔收心似有得入道真末由彼哉小
人儒勉旃君子求不學禍正平願師陳太邱更欲拭心
鏡照茲暗室幽光明生白地沈湎辭青州近因病處世
止酒
用柔克志剛乃濟柔不然柔道牽杞繫同膠舟忠信敦
古處虛浮謝名流倘荒學士學何異游民游養氣如陽
春勵節宜清秋我言君銘心君言我點頭放豚幸入蒞
飢鷹防脫鞵未足承人知敢曰文吾猶感子恩誼厚藥
石辱相投努力報故人印合忘離愁

黃天蕩懷古

浪花如屋掀天高天風浩浩江滔滔放舟直下急于駛
恍惚順風吹鴻毛舟中有客意氣壯左顧右盼神跌宕
長年對客發大言此間江是黃天蕩昔時擁兵韓蘄王
金山鏖戰何可當四十九日圍不解執鼓桴者夫人梁
小朝廷乃主和議擒虜何難縱虜易書生若非檜私人
獻策開河亦多事坐令上將虛奇功偏安何日回兩宮
精忠冤獄莫須有西湖不歸將母同百戰無成竟終老
湖上蹇驢蓄秋草翻使後來懷古人其幸英雄退身早
七百餘年身後名江間波浪鳴不平至今天陰月黑夜

怒潮猶作鼙鼓聲

倚虹園

繫纜小橋邊園荒草蔓延假山傾亂石破屋走寒煙桂
老香猶襲松敲蓋不圓繁華太消歇脩禊復何年

游仙詞

碧城縹緲白雲間閨苑雙扉瑣獸環忽聽花奴齊報道
潑天濃霧罩蓬山

六角屏風月色沈天風隔院送瑤琴分明一曲柴桑引
變作平沙落雁音

桃花紅雨散繽紛墮地還成五色雲青鳥不來花又謝

空勞王母問神君

織成雲錦手空空小立支機石畔東畢竟天孫多巧慧
讓他下界拾殘絨

湧出長空白玉盤元霜一杵擣靈丹嫦娥清福誰修得
碧海青天住廣寒

鳳帔麟衫帶笑迎箇人約畧董雙成玉環近日渾無事
閒向花前賭一枰

茜紗窗子間疎櫺銀蒜低垂草色青簾內有人持綵筆
細研香墨寫黃庭

耿耿星河欲曙天蘅蕪好夢又重圓夢中舊事分明記

蝶影軒存稿

卷之四

三

聞說黃姑賃聘錢

南游仙詞八章

吹起明珠瑟瑟塵雲
駟飛過大江濱
秦淮幻作臨邛市
竟有當壚賣酒人

誰向平池唱采蓮
踏開明鏡水痕圓
凌波仙子紅妝豔
綠鬢修眉半少年

白雪陽春浪費詞
鈞天雅奏幾人知
而今變盡薰風調
忙殺封家十八姨

楚客多情又送秋
秋聲寥慄悵靈修
上方贏得愁如海
偏是人間有莫愁

斑斑竹淚洒湘妃一夜秋風透葛衣
帝子近來消息斷空聞樂府唱呼豨

碧羅衫子縷金縵神女何年謫漢皋
萋綠無邊秋草恨可憐解佩亦徒勞

朝雲暮雨總荒唐臣里東家更渺茫
一笑文人遊戲筆空將詞賦賺襄王

桃葉桃根鼓畫橈蔣家小妹太憨嬌
六朝金粉飄零盡腸斷青溪舊板橋

北游仙詞八章

輕裝小隊走明駝不及霜華擁素娥
重向臙脂河畔望

笑他燕趙麗人多

纔騎鵬背發滄溟
手指青天數七星
獵獵朔風吹不住
又從葱嶺駕雲駟

本來眷屬住瓊京
跨鳳乘鸞別有情
絕世佳人空獨立
何曾名士悅傾城

燕昭好士渺難尋
臺址荒蕪落日沈
聞道神仙能點石
居人空自豔黃金

紫臺朔漠易黃昏
一曲琵琶出玉門
彷彿步虛環珮響
魂歸猶是漢皇恩

葉葉花花一色齊
長安夾道曉鶯啼
高樓合讓仙家住

那管浮雲北與西

玉宇瓊樓最上層錦屏圍繞百花燈乘槎飛過銀河去
不藉天梯度玉繩

月落參橫夜氣涼星娥含笑傍搖光手持斗柄俱遊戲
欲向人間挹酒漿

夢游東海歌

夢騎天上白玉虬激風排浪沖斗牛駢牛不語織女笑
請君返轡海東頭海水直立三千丈澈淡瀲灩天爲浮
其中曼衍多變化琪花異草穠香稠山經爾雅或不載
齊諸博物難窮搜老龍邀我陳百戲龍子起舞龍女謳

麟衫鳳帔進美酒巨羅斗大兕觥觥琉璃叢集若瓦礫
珊瑚林立如松楸瓊宮貝闕千萬所陸離光怪搖雙眸
蛟人淚珠落盈把蜃氣直上成岑樓若有人兮舊相識
毋乃洪崖與浮邱恍惚騰身百尺上遠聽仙樂鏗琳瑯
仰觀星精半頑石俯視水國同寒湫人生到此亦足樂
胡爲兀兀徒煩憂忽爾轟雷平地起飄然揖別煙霞儔
樽桑一輪紅日上耳畔猶聽談瀛洲

閨思

柳又青青草又肥月華如水倚柴扉
兒家夫婿眞游俠射虎南山夜不歸

陌上纔回油壁車綠陰門巷箇人家十三十五匆匆過
開遍庭前荳蔻花

瓜皮艇子木蘭橈盪過青溪舊板橋莫說征帆容易到
誤人歸信是江湖

芙蓉鏡裏悵飛蓬病起懨懨醉夢中不獨秋風感搖落
落花粘草怨春風

菱花四章

菱花減卻舊風姿翠輿單寒只自知寄語東塗西抹者
阿婆不是少年時

女伴相邀作嫁裳大家重檢鏤金箱投時別有新花樣

孤負寒燈刺繡忙

五湖煙水渺天涯
越女溪邊記浣紗
一自扁舟隨范蠡
金錢留與看東家

一曲清歌宛轉心
難從絃外覓知音
當筵不見周公瑾
象板檀槽誤到今

後夢游東海歌

手提七尺紅珊瑚
闖然直入龍宮居
老龍與我舊相識
張牙舞爪歡且呼
瓊漿玉液琉璃盞
哺糟啜醢傾百壺
百壺吸盡亦不醉
酒酣耳熱歌烏烏
龍神善解意中事
口含雲氣時吹噓
忽然長吟作人語
弩張劍拔胡爲乎

珊瑚枝七尺原足貴知否鐵網人間無奮臂向前抉魚目
卽此可以充明珠百琲十斛不經見夜光徑寸羣擲掄

堞影軒存稿卷之四終